

BOSNA I HERCEGOVINA  
Federacija Bosne i Hercegovine  
Tuzlanski kanton  
OPĆINA GRAČANICA  
OPĆINSKO VIJEĆE

Broj predmeta: 01-05--2014  
Broj akta: 01EH-001  
Gračanica, 2014. godine

Z A P I S N I K  
SA 18. SJEDNICE OPĆINSKOG VIJEĆA  
GRAČANICA

Održane dana 31. 03. 2014. godine u sali za sjednice nove zgrade Općine Gračanica, sa početkom u 11.00 sati.

Sjednici je prisustvovalo svih 30 članova Općinskog vijeća Gračanica.

Sjednicu je otvorio i istom predsjedavao Edin Ibrišević, predsjedavajući Općinskog vijeća Gračanica, zajedno sa zamjenikom Gazibegović Seadom i sekretarom Općinskog vijeća Mujačić Zehrom.

Zapisnik vodila Azra Mustajbašić, a vršilo se i tonsko snimanje sjednice.

Pored članova Općinskog vijeća Gračanica sjednici su prisustvovali i: Općinski načelnik Nusret Helić, općinski pravobranilac Jasminka Imširović, šefovi službi za upravu Senaida Šaković, Aida Hodžić, Zijad Dedić i Mustafa Bajić, predstavnici Plenuma Gračanice, predstavnici sindikata firmi "Grafopek" i "Olimp", predstavnici sredstava informisanja, te izvjestioci Begović Jasminka, Peljto Nedžad i Čoso Senada.

Zapisnik sa vanredne sjednice Vijeća održane 18. 02. 2014. godine usvojen je jednoglasno sa 30 glasova "ZA".

Zapisnik sa redovne sjednice Općinskog vijeća takođe je usvojen jednoglasno sa 30 glasova "ZA".

Pitanja i inicijative kandidovali su:

Fadil Mešić:

"Vijećničko pitanje je upućeno stečajnom upravniku "Kokaprodukt" Gračanica. Na zahtjev INTESA SANPAOLO BANKE zvanično je utvrđen stečaj 28. 11. 2011. godine. Za stečajnog upravnika određen je Hamdija Muratović. U trenutku otvaranja stečaja preduzeće je ostvarivalo značajne prihode po osnovu zakupnine firmi koje su izdate u zakup poslovnim partneru "Iradia" d.o.o. iz Laktaša. Prihodi su iznosili 52.500,00 KM (uključujući i PDV) na mjesečnom nivou. Po otvaranju stečaja stečajni upravnik je iznajmio i preostale dijelove imovine, tako da su mjesečni prihodi od zakupnine iznosili oko 65.000,00 KM.

"Kokaprodukt" je bilo vodeće preduzeće u BiH u oblasti proizvodnje jednodnevnih pilića za tov. U svom sastavu imalo je i sada ima:

- 20 farmi ukupne površine od 20.000 m<sup>2</sup>,
- najveću inkubatorsku stanicu u BiH, kapaciteta 16.000.000 jajnih mjesta na godinu,
- industrijsku klaonicu peradi, kapaciteta 3.000 pilića na sat.

Prema podacima iz računovodstva vrijednost stalne imovine "Kokaprodukta" prije otvaranja stečaja iznosila je 19.000.000,00 KM (ne uključujući imovinu na području RS) i ponavljamo, sva je bila u funkciji. Po otvaranju stečaja započeo je neselektivno otpuštanje radnika "Kokaprodukta", dakle onih ljudi koji su nekoliko godina prije otvaranja stečaja bili bez redovnih primanja, ali koji su ipak sačuvali svu imovinu i nisu dozvolili da se ona devastira, nego su čak vlastitim odricanjima održavali njenu proizvodnu funkcionalnost.

Dakle, stečajni upravnik je otpustio sve radnike, a zadržao je samo bivšeg direktora koji je jedan od krivaca što je dozvolio da do stečaja dođe. Možda ni to ne bi bilo čudno da

istovremeno stečajni upravnik na naša mjesta ne zapošljava druge nekompetentne ljude koji nikada nisu prije toga radili u "Kokaproduktu" i koji sada primaju plaću i lagodno žive na račun našeg prethodnog rada. Tako sada računovodstvene poslove u preduzeću u stečaju obavlja osoba sa završenom gimnazijom, osoba koja nema niti jedan certifikat iz oblasti računovodstva, administrativne poslove obavlja osoba koja je radila u bivšoj privatnoj firmi stečajnog upravnika. Izgleda da je jedini kriterij za zapošljavanje ovih ljudi bila odanost stečajnom upravniku. Nama to ne bi smetalo da te osobe nisu zauzele radna mjesta na kojima smo mi do jučer radili. Želimo da upoznamo stečajnog sudiju, javnost, predstavnike sindikata, vlasti i druge zainteresovane da su naši zahtjevi usmjereni na to da se u "Kokaproduktu" u stečaju pokrene proizvodnja i radnici vrata na posao kako bi mogli normalno živjeti, mi i članovi naših porodica.

Odgovorno tvrdimo da se pokretanjem proizvodnje stvaraju realne mogućnosti da se obaveze prema povjeriocima otplate kroz kvalitetno poslovanje. Za to postoje sljedeće pretpostavke:

- I sada prihodi od iznajmljenih farmi iznose 52.500,00 KM na mjesečnom nivou. Ta zakupnina se plaća rasplodnim jajima koja su osnovni input za pokretanje proizvodnje.

- Svi radnici su životni vijek proveli u peradarstvu i stručni su za ovaj posao.

- "Kokaprodukt" ima BH brend u proizvodnji jednodnevnih pilića za tov, što znači da tržište ne predstavlja problem. Umjesto svih ovih stvari tečajni upravnik intenzivno i naprečac pokušava onemogućiti pokretanje proizvodnje i voditi stečaj u pravcu potpunog zamiranja proizvodnje i prodaje imovine "Kokaprodukta" budzašto.

- Iznajmio je inkubatorsku stanicu najvećem konkurentu našeg preduzeća i to za mizernu zakupninu od 1.000,00 KM mjesečno. Prethodni iznosi zakupnina za inkubatorsku stanicu su bili čak i 10.000,00 KM. (Naglašavamo da je ovo najveća inkubatorska stanica u BiH).

- Takođe rasplodna jaja koja dobiva za zakupninu takođe daje tom preduzeću, te tako uništava svaku pretpostavku za pokretanje proizvodnje.

- Dozvolio je da od otvaranja stečaja preduzeće "Iradia" koja se nalazi u zakupu, farmi duguje više od 400.000,00 KM, što treba platiti rasplodnim jajima koja su osnov za proizvodnju. (Inače tako povoljan ugovor sa Iradijom stečajni upravnik je naslijedio i nije to rezultat njegovog rada).

- Poljoprivredno zemljište iznajmljuje po bagatelnim cijenama samo da radnici ne bi obavljali svoju djelatnost.

- Novčane prilive u procesu stečaja usmjerava za isplatu plata svojim poslušnicima, te kupovinu nepotrebne visoko sofisticirane kompjuterske i uredske opreme koja samo služi za obavljanje njegovih privatnih poslova.

Još bi mogli pisati i o stotini drugih stvari koje će samo potkrijepiti našu tvrdnju da cilj stečajnog upravnika nije pokretanje proizvodnje i vraćanje radnika na posao, već uništenje proizvodnih kapaciteta "Kokaprodukta" i njihovu prodaju dojučerašnjoj konkurenciji.

Još vas jednom molimo, nemojte zatvarati oči kako ne biste vidjeli svjesno uništenje svega onoga što smo mi radeći stvarali. Mi ne samo da smo radnici već smo i vlasnici udjela u "Kokaproduktu". Zatim tražimo od stečajnog upravnika da nas primi na razgovor. To je sve."

Ibrahim Hasić:

"Ja sam na prethodne dvije sjednice kako na jednoj tako i na drugoj uputio vijećničko pitanje Karate klubu Gračanica, te po prvom upućivanju nisam dobio ništa, a po drugom došlo je nešto, ali u tome se nigdje ne spominje moje ime, tako da ja ovo ne smatram odgovornom na moje pitanje. Trebalo bi bar da se negdje spominje kao i u nekim drugim odgovorima na moja pitanja. Odgovor je polovičan, ali kad bih ja sad spomenuo npr. imena ljudi koji su u upravnom odboru, to je čisti jedan nepotizam i najrađe neću ga komentarisati. A sad imam jednu inicijativu.

- Podnosim inicijativu Općinskom načelniku i Ministarstvu nauke, obrazovanja, kulture i sporta TK, a inicijativa se podnosi kako bi prestalo finansiranje Karate kluba Gračanica sa budžetskih sredstava ni sa jednom markom.

Obrazloženje: S obzirom da sam dva puta upućivao vijećničko pitanje istog sadržaja, a

ona se odnose na to da li Karate klub Gračanica ima skupštinu, kada je osnovana, kada je

održana izborna i ko su članovi iste. Takođe sam tražio da mi se dostave imena članova upravnog odbora, kada ga je skupština imenovala i nakon dva postavljena vijećnička pitanja nisam dobio odgovore. Trinaest godina članovi moje porodice su dio Karate kluba Gračanica i odgovorno tvrdim da nemaju, kako skupštinu tako ni upravni odbor. Prosudite i sami zašto nisam dobio odgovor i šta je pozadina. Nadam se da ćete ovu inicijativu ozbiljno shvatiti i zaštititi budžetska sredstva.”

Himzo Avdić:

“Imam inicijativu od grupe građana iz Stjepan Polja koju upućujem šefu Službe za razvoj i poduzetništvo i glasi:

Zahtjev za posipni materijal,

Molimo Vas da nam dodijelite posipni materijal za sporedni put Martići-Stjepan Polje, dionica Bare-Dživraci. Put je u lošem stanju te bi ga mogli sanirati sa posipnim materijalom od 70-100 m<sup>3</sup>. U potpisu je grupa građana, njih deset i da ih ne nabrajam sve molim da se zahtjev dostavi Službi sa potpisima građana.”

Mirsad Čamdžić:

“Ja imam jednu inicijativu. Naime, sinoć sam inspirisan prilogom TV Tuzlanskog kantona o jednoj porodici u Gračanici. Radi se o porodici Martić. Mislim da je situacija jako specifična, porodica koja je cijelo vrijeme u Gračanici i žive ispod svake granice dostojanstva, ispod svakog minimuma. Nažalost, ovaj puta moram to reći, radi se o porodici srpske nacionalnosti koja je cijelo vrijeme bila s nama i ovdje lokalna zajednica treba da pokaže jednu posebnu vrstu senzibiliteta pa bih zamolio ili tražio nekim zaključkom obavezu Općinskog načelnika, a inspirisan sam i prisustvom direktorice Centra za socijalni rad, da se na neki način reaguje i da se pomogne toj porodici. Porodica je u veoma teškom stanju. Radi se o Nadi, njenom bratu i sinu. Pa evo, koristim ovu govornicu samo u te svrhe da promovišemo taj problem ovako javno.”

Esma Pašić:

“Zamoljena sam od strane VMZ-e Gračanica da uputim jednu inicijativu prema Općinskom načelniku, a odnosi se na sljedeće.

- Da se izvrši rekonstrukcija javne rasvjete u gradu na način da se izmjene svjetiljke na mjestima gdje je to neophodno.

Obrazloženje: Obzirom da imamo veći broj uporišta javne rasvjete u gradu na kojima ne rade svjetiljke, što u mnogome utiče na slobodno kretanje u noćnim satima, a samim tim i na bezbjednost građana, učenika i djece. Iz tog razloga pozivam Općinskog načelnika da se u koordinaciji sa nadležnom službom izvrši rekonstrukcija rasvjete u gradu.

- Drugo postavila bih pitanje Općinskom načelniku, kada će se izvršiti asfaltiranje dijela puta u dužini od 210 metara na putnom pravcu Ritašići-Hajdarovac?

Obrazloženje: Obzirom da su građani prikupili učešće u iznosu od 20% za asfaltiranje navedenog putnog pravca, a ostatak sredstava je predviđen iz rente, smatram da bi bilo dobro da se izvrši asfaltiranje navedenog putnog pravca što prije.”

Edin Ibrisević, predsjedavajući Općinskog vijeća:

“Inicijativu upućujem JP “Komus” Gračanica, da za sjednicu Općinskog vijeća u mjesecu maju, pored izvještaja o radu i finansijskom poslovanju, pripremi i Odluku o visini naknade za odvoz komunalnog otpada. S obzirom na proširenje odvoza komunalnog otpada iz određenih seoskih mjesnih zajednica, sa tendencijom odvoza iz svih mjesnih zajednica, te uspješne realizacije projekta koji će općinu Gračanica učiniti ekološki odgovornom zajednicom, predlažem JP “Komus” da zbog povećanja obima posla smanji cijenu usluge odvoza smeća iz domaćinstava.”

Nije bilo više prijavljenih članova Vijeća za kandidovanje pitanja i inicijativa.

Predsjedavajući Vijeća je otvorio raspravu o predloženom dnevnom redu i sti pročitao, a koji glasi:

1. IZVJEŠTAJ O IZVRŠENJU BUDŽETA OPĆINE GRAČANICA ZA 2013. GODINU  
Izjavitelj: Nusret Helić, Općinski načelnik
2. IZVJEŠTAJ O UTROŠKU SREDSTAVA TEKUĆE REZERVE ZA PERIOD  
01. 01. -31. 12.2013. G.  
Izjavitelj: Nusret Helić, Općinski načelnik
3. ODLUKA O UTVRĐIVANJU PROSJEČNE KONAČNE CIJENE m<sup>2</sup> KORISNE STAMBENE  
POVRŠINE NA PODRUČJU OPĆINE GRAČANICA  
Izjavitelj: Aida Hodžić, šef Službe
4. ODLUKA O UTVRĐIVANJU VISINE NAKNADE ZA POGODNOST GRADSKOG  
GRAĐEVINSKOG ZEMLJIŠTA (RENTE)  
Izjavitelj: Aida Hodžić, šef Službe
5. PLAN UTROŠKA NAMJENSKIH SREDSTAVA IZ NAKNADE ZA KORIŠTENJE  
DRŽAVNIH ŠUMA NA PODRUČJU OPĆINE GRAČANICA  
Izjavitelj: Zijad Dedić, šef Službe
6. RJEŠENJE O IMENOVANJU PREDsjedNIKA I ČLANOVA NADZORNOG ODBORA  
JP VETERINARSKA STANICA GRAČANICA  
Izjavitelj: Nusret Helić, Općinski načelnik
7. PRIJEDLOG PLANA UPISA UČENIKA U PRVI RAZRED MJEŠOVITE SREDNJE ŠKOLE  
GRAČANICA U ŠKOLSKOJ 2014/2015. GODINI  
Izjavitelj: Tarik Nuhanović, direktor
8. IZVJEŠTAJ O RADU I FINANSIJSKOM POSLOVANJU JU CENTAR ZA SOCIJALNI RAD  
GRAČANICA ZA 2013. GODINU  
Izjavitelj: Jasminka Begović, direktorica
9. IZVJEŠTAJ O RADU I FINANSIJSKOM POSLOVANJU JU BOSANSKI KULTURNI  
CENTAR GRAČANICA ZA 2013. GODINU  
Izjavitelj: Nedžad Peljto, direktor
10. IZVJEŠTAJ O RADU I FINANSIJSKOM POSLOVANJU JU DJEČIJE ODANIŠTE „Naša  
djeca“ GRAČANICA ZA 2013. GODINU  
Izjavitelj: Senada Ćoso, direktorica
11. INFORMACIJA O PRIHODIMA OPĆINE GRAČANICA STEČENIM PO OSNOVU  
KONCESIJA U 2013. GODINI  
Izjavitelj: Zijad Dedić, šef Službe
12. NACRT-ZAKON O NOVČANIM PODRŠKAMA U POLJOPRIVREDI I RURALNOM  
RAZVOJU TUZLANSKOG KANTONA  
(NAPOMENA: Potrebno je da primjedbe, prijedloge i sugestije na Nacrt Zakona iznesete na  
sjednici Vijaća zbog kratkog vremena koje je ostalo za javnu raspravu)
13. RJEŠENJA I ZAKLJUČCI IMOVINSKO-PRAVNE SLUŽBE  
Izjavitelj: Aida Hodžić, šef Službe

Nije bilo učesnika u diskusiji i dnevni red 18. sjednice Općinskog vijeća Gračanica usvojen je jednoglasno sa 30 glasova „ZA“.

#### **TAČKA 1:**

IZVJEŠTAJ O IZVRŠENJU BUDŽETA OPĆINE GRAČANICA ZA 2013. GODINU

Uvodno obrazloženje po prvoj tački dnevnog reda dao je Općinski načelnik Nusret Helić: “Poštovani predsjedavajući, radno predsjedništvo, uvaženi vijećnici, predstavnici građana, mediji i gosti, sve vas pozdravljam i želim uspješan rad na današnjoj sjednici Općinskog vijeća.

Vi ste uz izvještaj o izvršenju budžeta Općine Gračanica za 2013. godinu dobili i detaljno obrazloženje i pojašnjenje kako prihoda, tako i izdataka te nema potrebe za dodatna pojašnjenja, ali ima potrebe da kažem nekoliko rečenica o ovom dokumentu.

Budžetsku 2013. godinu smo uspješno završili - ostvarili suficit, pozitivno poslovali, što je za BiH prilike i ovako tešku ekonomsku situaciju i krizu gotovo nevjerovatno.

Bez obzira koliko smo bili racionalni i odgovorni nebi uspjeli bez vaše podrške i vaših dobrih odluka.

Da podsjetim,

Budžet za 2013. godinu smo planirali u iznosu od 11.561.194 KM, od čega su :

- prihodi .....10.230.700 KM  
- primitci..... 1.061.000 KM  
- višak prihoda iz ranijeg perioda.....269.494 KM  
- izdaci..... 10.863.194 KM  
- otplate kredita..... 698.000 KM

Ostvarili smo budžet u 2013. godini u iznosu od 10.378.472 KM, od čega su :

- prihodi i primitci .....10.108.978 KM  
- izdaci..... 8.887.495 KM  
- otplate duga .....699.150 KM  
- višak prihoda .....791.827 KM

U odnosu na plan budžet je manje ostvaren za nešto više od 1 milion KM, zbog manje ostvarenih tekućih grantova i potpora viših nivoa vlasti od preko 600.000 KM i gotovo isto toliko manje ostvarenih kapitalnih potpora, takođe viših nivoa vlasti. Zbor toga neke stavke u budžetu nismo mogli realizovati te smo ih prenijeli u budžetska 2014. godine.

Ono što je dobro i pozitivno jeste da su porezni i neporezni (vlastiti) prihodi gotovo u potpunosti ostvareni u planiranim veličinama.

Kako se koja vrsta prihoda i rashoda ostvarivala vidjeli ste iz Izvještaja i obrazloženja i neću ih ponavljati, osim što ću napomenuti da su svi rashodi koji se odnose na administraciju (plate, naknade, troškove zaposlenih, materijalni troškovi i drugo) manje ostvareni od planiranih, što je potvrda našeg racionalnog ponašanja.

Na početku sam rekao da smo pozitivno poslovali i da smo ostvarili suficit.

On nije samo rezultat neutrošenih namjenskih sredstava, nego i naših ušteda. On bi bio i veći da nam je Kanton izmirio obaveze po osnovu sklopljenih ugovora i realizovanih projekata za koje smo izdvojili vlastita sredstva. Ja očekujem da će ova sredstva biti realizovana u ovoj godini.

I još nešto,

To što smo poslovali pozitivno i bez deficita omogućit će nam mnoge pogodnosti, ne samo kod eventualnih novih zaduženja - a izgleda moramo i o tome razmišljati, jer kako se odnosi Kanton, ne vjerujem da će uspjeti izmiriti ova sredstva, nego i kod kandidovanja projekata prema međunarodnim fondovima, vladama i drugim institucijama.

Nigdje ne možete dobiti sredstva ako ste u deficitu. Očekujem da će Vijeće dati podršku i usvojiti izvještaj o izvršenju budžeta za 2013. godinu. H v a l a!”

Komisija za propise i Statut je razmatrala Izvještaj i nema primjedbi.

Učesnici u diskusiji su:

Vehid Osmanović:

„Klub vijećnika SDP-a će podržati izvršenje Budžeta Općine Gračanica za 2013. godinu iz nekoliko razloga.

- Prije svega budžet je završen sa suficitom od 791.827,00 KM iako je realizacija budžeta

manja za preko milion maraka.

- Takođe budžet je ostvario većinu zacrtanih ciljeva u 2013. godini, a ono što nije realizovano prenešeno je u 2014. godinu i ima prioritet realizacije.

- I u izvršenju ovog budžeta mogu se pronaći stvari koje trebaju u navedenom periodu pretrpiti poboljšanja, prije svega u socijalnom sektoru.

- Možemo biti zadovoljni što smo općina koja nije u deficitu i nije prezadužena. Budžetom su obuhvaćene skoro sve kategorije stanovištva kroz razne vidove projekata..

- Za sve elemente ovog izvršenja budžeta za koje smatramo i utvrdimo da se mogu korigovati nabolje, unijecemo kroz rebalans budžeta u 2014. godini, a većina se odnosi na poboljšanje socijalnog stanja.“

Hasan Puškar:

„Klub vijećnika SDA je razmatrao izvršenje budžeta i isti će podržati zato što je izvršenje pratilo rebalans budžeta i svi su projekti većinom ispoštovani.“

Himzo Avdić:

„Klub vijećnika BPS-a podržat će Izvještaj o izvršenju budžeta iz razloga što se radi o suficitu kao što je načelnik i rekao uz jedno malo objašnjenje. Trebalo bi da nam se pojasni kako bi došlo do realizacije za, primljeni grantovi od Federacije 777.000,00 KM su trebali biti, a realizovano je samo 24,80%, dok je od Kantona 329.000,00 KM i realizacija je 98,83%. Malo da nam obrazložite zašto to iz Federacije nije realizovano jer je velika stavka.“

Odgovor je dao Općinski načelnik:

„Radi se dakle o projektima i prihodima koje smo planirali na bazi nekih odluka dobivenih od viših nivoa, kad je u pitanju Federacija. To su, prije svega toplifikacija koja je planirana u budžetu, vidjeli ste 650.000,00, a realizovano je samo nešto. Takođe za dva putna pravca, Ministarstva prometa federalnog gdje sredstva nisu realizovana, vjerovatno zbog dubioza u budžetu i prenesena su u ovu godinu. Takođe i neki projekti za vodosnabdijevanje gdje smo dobili odluke, za neke skopili i ugovore. Za neke smo završili i prošle i pretprošle godine ali nam duguju sredstva tako da očekujem da će većina ovih što nisu realizovani biti u ovoj godini. A ono što nam ne plate, a duguju nam, mi ćemo u ovoj godini podnijeti tužbe. Nadam se da će ova vlada imati sluha i tamo gdje su namjenska sredstva potrošena u nešto drugo, prikupiti i vratiti općinama jer su potpisani ugovori, a i izvođači su od nas to naplatili. Imamo jedan slučaj ne protiv gradnu stanicu, nego kartu upotrebne vrijednosti. Mi potpisali sa izvođačem, ljudi završili posao, karte došle, a mi nemamo odakle platiti i ljudi hoće da nas tuže. Prije toga ćemo mi tužiti ministarstvo. Dakle to su razlozi što nismo dobili sredstva i vjerovatno su tome doprinijele i ove dubioze budžeta i Kantona i Federacije, te to nismo mogli realizovati u prošloj godini.“

Prešlo se na izjašnjavanje i Izvještaj o izvršenju Budžeta Općine Gračnica za 2013. godinu je usvojen jednoglasno sa 30 glasova „ZA“.

## **TAČKA 2:**

IZVJEŠTAJ O UTROŠKU SREDSTAVA TEKUĆE REZERVE ZA PERIOD  
01. 01. -31. 12.2013. G.

Nije bilo dodatnog obrazloženja za ovu tačku dnevnog reda, a ni Komisija za propise i Statut koja je razmatrala Izvještaj, nije imala primjedbi.

Za diskusiju se javio Rahim Gadžić:

„Klub vijećnika SDA je razmatrao Izvještaj o utrošku sredstava budžetske rezerve za 2013. godinu te utvrdio da su sredstva potrošena u onu svrhu u koju treba da se potroše i apsolutno podržavamo utrošak budžetske rezerve za 2013. godinu.“

Izvještaj o utrošku sredstava tekuće rezerve za period 01. 01. – 31. 12. 2013. godine je usvojen jednoglasno sa 30 glasova „ZA“.

### **TAČKA 3:**

#### **ODLUKA O UTVRĐIVANJU PROSJEČNE KONAČNE CIJENE m<sup>2</sup> KORISNE STAMBENE POVRŠINE NA PODRUČJU OPĆINE GRAČANICA**

Komisija za propise i Statut je razmatrala Odluku i nije imala primjedbi.

Za diskusiju se javila Rukija Begović:

„Klub vijećnika SDA je razmatrao Odluku o utvrđivanju prosječne konačne cijene m<sup>2</sup> korisne stambene površine na području općine Gračanica u iznosu od 850,00 KM i podržava ovakvu odluku.“

Odluka o utvrđivanju prosječne konačne cijene m<sup>2</sup> korisne stambene površine na području općine Gračanica je usvojena jednoglasno sa 30 glasova „ZA“.

### **TAČKA 4:**

#### **ODLUKA O UTVRĐIVANJU VISINE NAKNADE ZA POGODNOST GRADSKOG GRAĐEVINSKOG ZEMLJIŠTA (RENTE)**

Nije bilo učesnika u diskusiji, a Komisija za propise i Statut nije imala primjedbi. Odluka o utvrđivanju visine naknade za pogodnost gradskog građevinskog zemljišta (RENTE) je usvojena jednoglasno sa 30 glasova „ZA“.

### **TAČKA 5:**

#### **PLAN UTROŠKA NAMJENSKIH SREDSTAVA IZ NAKNADE ZA KORIŠTENJE DRŽAVNIH ŠUMA NA PODRUČJU OPĆINE GRAČANICA**

Nije bilo učesnika u diskusiji i Plan utroška namjenskih sredstava iz naknade za korištenje državnih šuma na području općine Gračanica je usvojen jednoglasno sa 30 glasova „ZA“.

### **TAČKA 6:**

#### **RJEŠENJE O IMENOVANJU PREDSJEDNIKA I ČLANOVA NADZORNOG ODBORA JP VETERINARSKA STANICA GRAČANICA**

Nije bilo učesnika u diskusiji i Rješenje o imenovanju predsjednika i članova Nadzornog odbora JP Veterinarska stanica Gračanica je usvojeno jednoglasno sa 30 glasova „ZA“.

### **TAČKA 7:**

#### **PRIJEDLOG PLANA UPISA UČENIKA U PRVI RAZRED MJEŠOVITE SREDNJE ŠKOLE GRAČANICA U ŠKOLSKOJ 2014/2015. GODINI**

Uvodno obrazloženje po ovoj tački dnevnog reda dao je direktor Mještovite srednje škole Tarik Nuhanović:

„Ja ću pokušati u što kraćem periodu da elaboriram ovaj problem i da vas upoznam o sljedećem. Mi smo negdje početkom februara mjeseca dobili dopis od Ministarstva obrazovanja, nauke, kulture i sporta TK gdje se traži da provedemo određene aktivnosti u vezi prijema učenika za narednu školsku godinu. Odmah ću da kažem da smo ovom prilikom dužni, znači kad radimo ove radnje, ispoštovati određenu proceduru. Tako smo konsultovali vijeće poslodavaca, odnosno tražili smo sa Zavoda za zapošljavanje općine Gračanica da vidimo koliko je nezaposlenih ljudi po određenim strukama. Ja ću da vas izvijestim da smo mi 11. februara

održali sastanak sa predstavnicima privrednih subjekata općine Gračanica. Znači, ukupno 28, a mislim da nema potrebe da čitam imena firmi kojima smo dostavili određene pozive. I na osnovu rasprave sa njima, došli smo do nekakvog prijedloga koja odjeljenja, struke i zanimanja, odnosno zvanja treba da upišemo u narednu školsku godinu. Procedura je otprilike bila sljedeća. Formulirali smo naše prijedloge, onda smo održali sjednicu Nastavničkog vijeća 13. marta na kojoj smo utvrdili definitivno koja su zvanja i zanimanja predložena da se upišu. Ako mi dozvolite vašu ću pažnju zadržati jedno dvije minute da vam to iščitam. A ja vjerujem da ste i vi dobili u vašim materijalima kako bi mogli da vodimo kvalitetnu raspravu. Prijedlog poslije našeg usaglašavanja prijedloga bi trebao da bude sljedeći. Mašinski tehničar-operator na CNC mašinama jedno odjeljenje, elektrotehničar energetike jedno odjeljenje, ekonomski tehničar-finansijsko računovodstveni smjer EUVET jedno odjeljenje, poslovno-pravni tehničar EUVET jedno odjeljenje, medicinska sestra-tehničar jedno odjeljenje, farmaceutski tehničar jedno odjeljenje, zubni tehničar jedno odjeljenje, građevinski tehničar EUVET jedno odjeljenje, turistički tehničar EUVET jedno odjeljenje i tehničar za bezbjednost drumskog saobraćaja jedno odjeljenje. Znači sa ovim bismo završili listu četverogodišnjeg školovanja i ukupno je deset odjeljenja. Prijedlog za zanimanja to jest III stepen bio bi sljedeći. Zavarivač jedno odjeljenje, automehaničar jedno odjeljenje, vozač motornih vozila jedno odjeljenje, bravar jedno odjeljenje, elektromehaničar jedno odjeljenje, trgovac EUVET jedno odjeljenje, kuhar EUVET jedno odjeljenje i imamo sad jedno kombinovano odjeljenje koje se sastoji, pola su zidari pola tesari. Imamo još dva odjeljenja, a to je krojač po EUVET programu i frizer-vlasuljar jedno odjeljenje. Znači prijedlog koji se upućuje vama na razmatranje jeste da se naredne školske godine u Mješovitu srednju školu Gračanica upiše dvadeset odjeljenja. Da li ćemo u tome uspjeti sve zavisi, jer imamo još uvijek problem sa nedovoljnim brojem učenika, ali ja se nadam da ćemo uspjeti. Uz zahvalu i želju da usvojite ovaj plan ja vas pozdravljam, hvala.“

Učesnici u diskusiji su:

Edin Ibrišević:

„Ja bih, ako je moguće direktoru samo uputio jedan prijedlog, da se vodi računa i o tome u narednom periodu. S obzirom da je ovo vijeće usvojilo jedan strateški dokument koji se zove Općina Gračanica inkluzivna zajednica. Mislim da bi trebali s vremena na vrijeme u Srednjoj mješovitoj školi da predvidimo jedno odjeljenje u kojem bi djeca, da kažem, koja su sa posebnim potrebama, a i oni koji to mogu mogli da se obuču za jedno pomoćno zanimanje. Da to znači ne bude stalno, ali s vremena na vrijeme kad se ukaže potreba. Prema nekim podacima imamo oko 160 djece koja imaju posebne potrebe, ali evo od tih svih naravno oni koji mogu, mislim da bi se moglo organizovati jedno odjeljenje uz stručnu pomoć lica za to. To je jedna sugestija da se u narednom periodu vidi i ta mogućnost.“

Nihad Krajinović:

„Po broju ovih odjeljenja predloženih ovdje od strane Mješovite srednje škole s obzirom na broj učenika, teško da ćemo moći popuniti sva ova odjeljenja. Po onome što sam ja na brzinu mogao izračunati dođe da bi u svakom odjeljenju bilo po 17 učenika ako se ne varam. Iako je prvi razlog javljanja bio da se razmišlja o uvođenju jezičke srednje škole. Ovdje se treba kada su u pitanju ova predložena odjeljenja, da se pokuša malo sabiti i dati prioritet da kažem u vrednije škole, odnosno u odjeljenja gdje će učenici više koristiti imati, jer ako Gimnazija planira upisati 150 učenika, onda ovdje ostaje to da u svakom odjeljenju bude 17 učenika.“

Mujo Hasić:

„Ja bih samo da uputim sugestiju da se obrati pažnja na jezike. Da učenici srednje škole uče jezike i da im se poveća fond časova ako to dozvoljava pedagoški standard. Zašto to sugerišem. Pa evo, kad završi školu mašinski tehničar ili neki drugi tehnički smjer, ako ne želi ići na fakultet i želi da se zaposli, zbog sve veće nabavke sofisticirane opreme koja je u principu na stranim jezicima, nailazi na problem sa upravljanjem tom opremom. To je s jedne strane i s druge strane, ako ti budući završeni srednjoškolci ne mogu zasnovati radni odnos na području BiH, prisiljeni su da idu, nažalost, negdje vani i s te strane bi im dobro došlo da znaju strane



jezike. Evo npr. u posljednje vrijeme je stalno potražnja za medicinskim kadrom i koji nakon završetka srednje škole ponovo plaćaju kod ovih centara za obrazovanje odraslih, određene kurseve da bi dobili taj certifikat kako bi mogli aplicirati za jedno od takvih radnih mjesta. I na kraju kad to sve organizuju, završe školu, znaju jezike, ako ne budu imali prakse džaba im diploma, džaba im sve ovo što oni završe. Znači mora se obratiti pažnja i omogućiti srednjoškolcima, pogotovo s tehničkim usmjerenjem da se na području općine Gračanica kod pravnih ili drugih subjekata, organizira praktična nastava kako bi se oni upoznali sa procesom proizvodnje za buduća radna mjesta. Svjedoci smo da takvi dođu i prvi puta se susreću sa opremom na kojoj treba da pođu raditi.“

Senad Selimović:

„Klub vijećnika SDA podržava Plan upisa u I razred Mješovite srednje škole u školskoj 2014/2015. godini sa jednom sugestijom, da se u Plan upisa uvrsti po mogućnosti i jedno odjeljenje kozmetičara, pedikera. Gospodine direktore, ja u svoje ime vama, svim profesorima i svim uposlenim u JU Mješovita srednja škola Gračanica želim mnogo sreće i uspjeha u budućem radu.“

Odgovore na sugestije dao je direktor JU Mješovita srednja škola Gračanica Tarik Nuhanović:

„Ja bih prvo da se obratim prisutnim da ne shvate ovu moju sad priču kao repliku, nego samo kao diskusiju, koja treba neke malo nejasnoće raščistiti tako da imamo jasnu sliku pošto smo svi skupa zainteresovani da nam obrazovanje najbolje funkcioniše. Po najnovijim tim zakonima koji se danas uvode, ne samo u BiH nego i u cijeloj Evropi, inkluzivna nastava je zastupljena na jedan novi oblik i način, a to je da se ti učenici aktivno uključuju u redovnu nastavu. Mi imamo slučajeve, naročito u trgovačkoj struci i novim profilima zanimanja gdje nam učenici sa tim potrebama pohađaju nastavu ali kao redovni učenici. To je jedna tendencija i preporuka i iz Ministarstva, Zavoda i svih ovih stručnih službi koje se bave obrazovanjem. Mi tu imamo velikih problema. Zbog čega? Zbog toga što taj trgovac završi srednju školu, ima diplomu trgovca i on aplicira na radno mjesto. Tu se sad javlja problem, da li je on spreman da radi sve ove poslove u Fisu, Bingu itd. I ja sam lično par puta na savjetovanjima, naročito u decembru mjesecu kad je bio jedan okrugli sto, govorio upravo ovo što vi govorite, evo posebno predsjedavajući, da ti učenici idu u redovnu nastavu i da dobiju diplomu npr. kao pomoćni radnik, da može raditi ta prostija zanimanja itd. Drugo pitanje, jezici. Devetogodišnje obrazovanje obuhvata da se uče dva jezika, njemački i engleski. I onda učenik dolaskom u srednju školu izabere šta želi da uči, pod a) i pod b). Nastava pod a) je organizovana od ponedjeljka do petka, a nastava pod b) organizovana je subotom. Znači svi koji žele mogu da pohađaju, da se opredijele. Čak sam dudžan da vas obavijestim da smo mi uveli tzv. fakultativnu nastavu, gdje se javila jedna određena potreba da učenici uče francuski jezik, italijanski, a naročito njemački jezik. To je zbog toga što, evo i kolega Hasić je napomenuo. Ranije je bilo, diploma medicinske škole i pravac Njemačka na posao. Međutim, sad traže potvrdu da je položio njemački jezik, da za to ima certifikat i broj dva, sad su uveli da ima pložen stručni ispit, tako da ti učenici volontiraju i onda s tom dokumentacijom mogu aplicirati da idu vani da rade. Prijedlog za odjeljenje pedikera, ideja nije loša ali ja kolegi predlažem da to predloži za školsku 2015/2016. godinu pa ćemo vidjeti mogućnosti. Morate znati da mi prvo moramo da obezbijedimo uslove za odvijanje praktične nastave pa tek onda da idemo sa zahtjevima za Plan.“

Prešlo se na izjašnjavanje i Plan upisa učenika u prvi razred Mješovite srednje škole Gračanica u školskoj 2014/2015. godini je usvojen jednoglasno sa 30 glasova „ZA“.

Nakon toga data je pauza u trajanju od petnaest minuta. Nastavku sjednice prisustvuje svih trideset vijećnika.

## **TAČKA 8:**

IZVJEŠTAJ O RADU I FINANSIJSKOM POSLOVANJU JU CENTAR ZA SOCIJALNI RAD  
GRAČANICA ZA 2013. GODINU

Uvodno obrazloženje je dala Jasminka Begović, direktorica JU Centar za socijalni rad Gračanica.

„Htjela bih samo kratko da vas upoznam sa informacijom koja se ne nalazi u Izvještaju o radu Centra, a to je, da se upravno rješavanje, odnosno prvostepeni postupak vodi u Centru za socijalni rad. Koji obim poslova je bio samo ću vam iznijeti neke podatke. Za prošlu godinu na ime tjelesnog oštećenja organizma za korisnike prava sa naše općine iz federalnog budžeta isplaćeno je 1.777.000,00 KM. Za 2012. godinu isplaćeno je 2.600.000,00 KM, za 2011. isplaćeno je 2.657.000,00 KM, od toga 1.659.000,00 KM redovno, 1.018.000,00 KM retroaktivno. Ovdje nisu navedene civilne žrtve rata za koje sredstva obezbjeđuje 50% Federacija a 20% iz budžeta Kantona. Dalje kad je u pitanju priznanje prava po osnovu kantonalnog zakona za prošlu godinu po osnovu priznatog prava od strane Centra za socijalni rad prema budžetu Kantona trebalo je preko 1.500.000,00 KM. Za 2012. i 2011. godinu preko milion KM za svaku godinu. Htjela bih još da vam napomenem, nije znači bilo zahtjeva koji nisu riješeni u roku, niti je bilo prekoračenja roka onih propisanih zakonom. Jedino htjela bih da vas podsjetim, a vi znate da je Centar u proteklom periodu bio predmet provala i da smo to riješili tehničkim obezbjeđenjima objekta. Poslije toga je bilo nekih pokušaja ali blagovremenom intervencijom posljedica nije bilo. Ali osjećam potrebu da vas upoznam da u narednom periodu razmišljamo o fizičkoj zaštiti, ne samo zaposlenih, nego i stranaka. Znajući kakva je nadležnost Centra, šta rješava, koja prava, imovinske stvari iz porodične zaštite, a znajući koja struktura stanovništva se javlja, koji poslovi su prošireni, želim samo da vam prosljedmi informaciju i da se u narednom periodu ozbiljno razmišlja i o ovome. Do sada smo se nekako nosili s tim, ali trenutne potrebe su drugačije.“

Učesnici u diskusiji su:

Nihad Krajinović:

„Klub vijećnika SDP-a daje punu podršku radu Centra za socijalni rad Gračanica, cijeneći situaciju u kojoj je radio u okviru poslovnih i društvenih uslova i uz informaciju da je jedan od najbolje ocijenjenih centara za socijalni rad na području BiH. Ono što bi bio naš prijedlog i sugestija je da se što prije popune upražnjena radna mjesta kako bi olakšali rad i što hitnije pristupi revidiranju i izradi nove socijalne karte stanovništva na općini. U koordinaciji sa vijećima mjesnih zajednica da se sagledaju realna stanja u kojima se nalaze već postojeći, to jest potencijalni korisnici usluga po bilo kom osnovu. I evo informacije da je u MZ-i Pribava omladinsko udruženje krenulo u neku internu izradu socijalne karte ove MZ-e i realno sagledavanje potreba i stanja tamošnjeg stanovništva. Evo prijedlog našem centru da pokuša sa VMZ-a da malo koordiniraju na ovom poslu. Takođe molimo da se angažuju dodatno, uz pomoć ostalih institucija naravno, i izvrše pritisak ako na to imaju pravo, na suzbijanje prosjačenja na našoj općini, posebno u gradu, a s posebnim akcentom na zloupotrebu maloljetnika u te svrhe. Njih je nažalost sve više i nemoguće ih je ne primijetiti. Dajemo svakako punu podršku da se centru obezbijedi zaštita.“

Esad Tursunović:

„Svaki dan sam u prilici da kontaktiram sa stanovnicima, onima u naselju kod smetlišta. Znamo da prose, ali bih molio da se izađe i utvrdi nasilje od strane odraslih nad djecom, pa ako može i policija da se angažuje u vezi s tim.“

Hasan Fehratović:

„Iznijet ću mišljenje i eventualno neke zaključke u ime Kluba vijećnika SDA kad je u pitanju Izvještaj o radu Centra za socijalni rad. Kao i prethodnih godina moram reći da je Izvještaj ove javne ustanove detaljan, jasan i transparentan i naravno i Izvještaj i rad je za svaku pohvalu. Ne bih da detaljno čitam neke dijelove iz Izvještaja, ali ću napomenuti da tamo stoji jedan naslov realizacija, u realizaciji opštih programskih zadataka ukupno obrađeno čini mi se 21 oblast ili djelatnost, što znači da se stvarno radi o jednom širokom dijapazonu, ako se uzme u obzir kadrovska struktura i kako sam primijetio sve je urađeno i realizovano sa šestoro

uposlenika. Danas imamo još neka preduzeća i ustanove i u poređenju dakle sa drugim javnim ustanovama i javnim preduzećima i uzimajući u obzir obim poslova, mislim da je stvarno i realno i opravdano da se konačno ispoštuju prijedlozi mjera od strane Centra za socijalni rad. Svake godine mi to usvajamo ali nema realizacije, mislim na kadrovsko osposobljavanje. Jedno pitanje u ime kluba je, da li je moguće dobiti spiskove korisnika stalne novčane pomoći i po MZ-a. To su tražili i neki predsjednici VMZ-a. Dakle, Klub vijećnika SDA podržava Izvještaj i ponoviti ću, za ovaj širok dijapazon djelovanja stvarno još jedanput pozivamo sve relevantne faktore da trebaju podržati ovu ustanovu te kadrovski je proširiti. Naravno, mislim da i to trebamo razmisliti i finansijski je dodatno podržati, jer smatramo da je ovo ustanova koja je postala i jedna od najvažnijih na općini.“

Fadil Mešić:

„Jeno pitanje direktorici. Znači porodica je boravila na prostoru federacije BiH, to jest naše općine do 31. 12. 2013. godine, kada je nastupila i smrt u porodici, a potom se odselila u Republiku Srpsku. Da li oni imaju pravo na novčanu pomoć za sahranu to jest dženazu?“

Sead Gazibegović:

„Mislim da je ovo tačka dnevnog reda u okviru koje bi se trebali podsjetiti na jedan dokument kojeg je ovo vijeće usvojilo prošle godine. Ne znam tačan naziv, čini mi se Program socijalnog uključivanja Općine u itd. Autor tog dokumenta je čini mi se neka nevladina organizacija i u okviru tog dokumenta bilo je više zaključaka gdje se u te aktivnosti uključuje i Centar za socijalni rad. Jedan od tih zaključaka je bio da se putem Centra za socijalni rad omogući svršenim a nezaposlenim licima medicinske struke da volontiraju, odnosno da im se organizuje volontiranje i na određen način odrađivanje pripravničkog staža kroz obilazak i brigu o starim i iznemoglim licima. Ne znam je li na tome šta dalje rađeno, to bi bilo pitanje i podsjećanje, ako nije da se te aktivnosti malo ubrzaju. Čini mi se da na spisku ovih organizacija kojima je Centar za socijalni rad saradivao nema te nevladine organizacije, odnosno ne spominje se taj dokument, pa bi to trebalo ponovo malo aktivirati. Inače, jedini dio ovog izvještaja koji mi se ne sviđa jeste ona stavka prihodi. Mali su i nadam se da ćemo se svi zajedno potruditi da se dio sredstava bilo s koje strane pa i iz budžeta obezbijede Centru za socijalni rad za njegov dalji i uspješniji rad.“

Mirza Omerdić:

„Evo i ja sam izašao, nisam planirao, Sejo me je malo na to ponukao. Meni se čini dakle da je ovdje najveći problem, odnosno jedan od najvećih problema novac. Sa ovim budžetom Centar za socijalni rad vjerovatno rješava one stvari koje su ustvari hitne. Nemaju prostora ni u kadrovskoj popunjenosti, da imaju i neke možda šire aktivnosti. U tom smislu ja se slažem sa Sejom da moramo ukoliko dođe do rebalansa budžeta, voditi računa da se izdvoje sredstva jer je ovo bitna stvar. Mi smo imali socijalne nemire i jedan od načina predupređivanja ovih stvari je preko Centra za socijalni rad. Ja bih vas molio da podržimo, kako bi se budžet što više povećao i kako bi se moglo uvrstiti planom ono što je direktorica kazala o kadrovskoj strukturi.“

Hasan Puškar:

„Moje pitanje je, koliko je tačno uposlenih u Centru za socijalni rad? Šest. Dobro, a 108.000,00 KM neto plaće podijeljeno na šest i podijelimo na dvanaest mjeseci ispadne prosječna plaća na ruke isplaćena 1.500,00 KM, plus topli obrok i regres. A evo imamo i druge ustanove na dnevnom redu, da ne ispadne samo da hvalimo pa ćemo tamo skretati pažnju na neke stvari kod drugih ustanova.“

Odgovore na sugestije dala je Jasminka Begović:

„Evo prvo bih na inicijativu Čamdžić Mirsada vezano za zbrinjavanje gospođe Nade. U proceduri je pitanje njenog zbrinjavanja. U pitanju je kompletiranje dokumentacije i rješavanje te situacije i to je jako teško. Što se tiče socijalne karte, bila je iz Kantona inicijativa da ide kao pilot projekat Općina Gračanica i Tuzla. Međutim nekih oko dva miliona maraka je potrebno sredstava obezbijediti na ime socijalne karte i onda je bila inicijativa da se vidi sa fakultetom socijalnog rada mogućnost volontiranja od strane studenata i to je ostalo tako u rješavanju zbog

čega vam ne mogu pružiti neku dalju informaciju. Ali evo imamo od MZ-e Lukavica konkretan zahtjev za dostavljanje spiskova svih korisnika sa područja MZ-e Lukavica vezano upravo za snimanje stanja, odnosno za ostvarivanje prava korisnika sa područja MZ-e. Što se tiče inicijative Tursunović Esada vezano za nasilje, to moramo konkretno rješavati na licu mjesta. Ima načina, ima protokol o rješavanju intervencija nasilja na kantonu i u toku je izrada protokola i u radnoj sam grupi kao koordinator ispred Centra za socijalni rad. Ima mogućnosti za rješavanje nasilja i zakonskih mjera. Pitanje vezano za stalnu novčanu pomoć i dostavljanje spiskova, nije nikakav problem. Ima sve u bazi urađeno tako da mogu sve MZ-e dobiti spisak za korisnike koji su ostvarili pravo, ne samo stalne novčane pomoći nego i sve ostale vrste pomoći. Pitanje Mešića za dženazu, po zakonu, kantonalnom zakonu pravo na troškove dženaze-sahrane i pokopa imaju korisnici stalne novčane pomoći, lica koja su smještena u porodice i ustanove socijalne zaštite. Vezano za medicinske sestre, konkretno nismo imali nikakvog obraćanja i kontakta, ali sasvim uredu je i krenut ćemo u te aktivnosti, to podržavamo. Vjerujte zatrpali smo i upravnim rješavanjem, ali je i ovo itekako potrebno. Zhvaljujem na podršci od strane Omerdića i Fehratovića. Vezano za primanje i plate što je pitao Puškar Hasan. Mi smo imali radnicu koja je otišla polovinom prošle godine u penziju, a imali smo gospodina socijalnog radnika koji je umro u martu mjesecu. Toliko.“

Hasan Puškar:

„Samo se ne zahvaliste meni koji sam kritikovao. Moje pitanje je bilo upućeno na osnovu ovoga. Plan kaže 01. 01. – 31- 12, a ostalo 01. 01. -31. 09. Znači je li ovo neka greška ili je i ovdje trebalo biti 31. 12, jer ispade da je u izvještaju prikazano samo devet mjeseci. Znači sad više nije ni prosjek plate kao što je bio jer nema desetog, jedanaestog i dvanaestog mjeseca. Ima znači greška u izvještaju i htio sam znači na to skrenuti pažnju.“

Za diskusiju se javio i Općinski načelnik Nusret Helić:

„Neću puno, dakle Centar radi svoj posao dobro u kakvim uslovima radi i sa kakvim sredstvima. Ali hoću da predložim zaključak. Bez obzira šta je rađeno na nivou Kantona, projekat socijalne karte. Ovo vrijeme novo zahtijeva od nas da Centar za socijalni rad Gračanica bude nosilac aktivnosti oko izrade socijalne karte zajedno sa mjesnim zajednicama. Mi izdvajamo dobra sredstva i dajemo za neke jednokratne pomoći pa možda nas neko i prevari itd. Dakle, morate biti nosioci i to treba da bude jedan zaključak. A drugo je da ćemo mi kroz rebalans budžeta obezbijediti sredstva da dođemo do kvalitetnijeg rješavanja socijalnih problema.“

Prešlo se na izjašnjavanje i predsjedavajući Vijeća je definisao zaključak da se isprave greške u Izvještaju i da se radi na aktivnostima izrade socijalne karte, te da VMZ-a dostave spiskove korisnika stalne i druge socijalne pomoći, kao i da se Izveštaj usvaja.

Sa 29 glasova „ZA“ usvojen je zaključak.

## **TAČKA 9:**

### **IZVJEŠTAJ O RADU I FINANSIJSKOM POSLOVANJU JU BOSANSKI KULTURNI CENTAR GRAČANICA ZA 2013. GODINU**

Uvodno obrazloženje dao je Nedžad Peljto, direktor JU Bosanski kulturni centar Gračanica.

„Prošle godine kada sam izvještavao o radu JU Bosanski kulturni centar Gračanica rekao sam da se nažalost gasi kino, obzirom da se prelazi na novi medij, novi način prikazivanja filmova. Ubrzo smo uspjeli dogovoriti novi način prikazivanja filmova i sklopili smo ugovor sa privatnom firmom putem koje to radimo zadnju godinu dana, na osnovu koje sada i čitav kanton ima mogućnost prikazivanja filmova. Takođe želim da kažem da nam je uveliko olakšalo poslovanju BKC-a praćenje Općinskog vijeća, odnosno načelnika što se tiče finansiranja BKC-a kao jedne neprofitne organizacije u kojoj djeluje pet raznih organizacija i koje su većinom

neprofitne. Ugovor koji smo imali sa BH Telekomom takođe nam je olakšao razne kulturne aktivnosti koje smo vam dostavili u Izvještaju.“

Učesnici u diskusiji su:

Rahim Gadžić:

„Ja ću da kažem nešto u svoje lično ime, a u ime Kluba će drugi vijećnici. Zanima me prvo evo ugovor o djelu gdje u Izvještaju stoji da je planirano 3.000,00 KM, a potrošili ste 14.718,00 KM. Zbog čega je došlo do tolikog odstupanja u odnosu na plan? Zatim, koliki vam je prihod od kulture, odnosno koliko BKC ostvari prihoda na godišnjem nivou? Zatim znajući da iz budžeta Općine Gračanica povučete sredstva u iznosu od oko 280.000,00 KM, kako i stoji u materijalu. Već duže vremena sam tražio da BKC, u čijem sastavu je i Radio Gračanica, bude dostupan svim građanima općine Gračanica, mislim na signal. Jedne godine smo za to i odvojili sredstva, a ta sredstva ste potrošili za svoje djelatnosti. Niste još ništa uradili na tom polju. Zanima me da li planirate u narednom periodu da se doživi i da Radio Gračanica bude slušana u svim područjima općine Gračanica? To je lokalni radio i radio koji treba da slušaju svi građani. Ako niste u stanju uraditi to, treba reći, jer ne možete vi uzimati ovoliko sredstava iz budžeta Općine Gračanica, a pokrivati signalom samo jedan dio općine Gračanica. Ja sam to nekoliko godina pokušavao da iniciram i na kraju odustao jer vidim da nema interesa BKC-a da taj dio posla uradi. Tada ste govorili da nemate dozvole od RAK-a, drugo će biti razlog nema sredstava, treće će biti razlog neki drugi i tako će se jedan po jedan vjerovatno redati i u narednih 20 godina će se iznalaziti razlozi za to. Ja smatram da to nije uredu jer ako je to lokalna radio onda ga trebaju slušati svi građani općine Gračanica.“

Mujo Hasić:

„Ja ću o jednom podatku iz Izvještaja. Izvještaj o poslovanju za period taj i taj i kaže se imamo prihode od ulaznica pozorišta u iznosu od 5.842,00 KM. Ako uzmemo u obzir da je navedeno kako je bilo 11 pozorišnih predstava, a između ostalog bilo je tu i dobrih predstava i gračanička publika je pokazala da hoće da prisustvuje dobrim i kvalitetnim i hoće da prati. Ako je bilo 11, a ulaznica je bila 8,00 ili 5,00 KM čuo sam, jer iste nažalost nisam posjećivao, čuo sam da je sala bila popunjena, onda mi nešto ova matematika nije dobra. Možda je neka greška, ali bih volio da mi se to pojasni.“

Ibrahim Hasić:

„Pošto sam ja već u šestoj godini, odnosno ovo je druga godina ovog drugog mandata, ja sam zapamtio da Gadžić ovu jednu te istu stvar ponavlja toliko godina. Znači šest godina. I tek sam ga shvatio u ovoj godini, to jest u ovom danu, da zaista treba jednom reći ili bit će, da tako kažem, snabdjevan sa signalom Radio Gračanice i onaj tamo posavski dio općine Gračanica ili neće biti. Za toliko godina da se svake godine odvajalo po 1.000,00 KM za ovih šest godina mislim da se nešto moglo napraviti. Prema tome u cjelosti podržavam Gadžića i mislim ako treba neki poseban način izvora finansiranja naći da se to uradi, jer krajnje je vrijeme.“

Vehid Osmanović:

„Klub vijećnika SDP-a će podržati Izvještaj o radu Bosanskog kulturnog centra Gračanica za 2013. godinu, uz nekoliko primjedbi, prijedloga i sugestija.

- Prije svega primjetno je da su sredstva iz budžeta od 280.250,00 KM puno veća od zakonske obaveze izmirenja troškova uposlenika čiji je broj za nas upitan. Zato predlažemo analizu postojeće sistematizacije radnih mjesta u BKC-u.

- Vidljivo je da su skromni vlastiti prihodi, te prihodi od reklama za koje znamo da su ograničeni. Smatamo da se ti prihodi trebaju povećati u narednom periodu kako bi pokrili bar troškove vezane za pojedine manifestacije.

- Pohvalno je da smo imali nekoliko zaista posjećenih manifestacija gdje je velika sala BKC-a bila prepuna kod pojedinih predstava i filmova, te je potrebno taj fond gledanosti još popraviti.

- Za dopisništvo TV-e TK-a možemo reći da je kvalitetno i profesionalno prezentovalo sva bitna događanja na našoj općini u 2013. godini i opravdalo svoju funkciju.

- Preporučujemo uredništvu Radio Gračanice da poradi na programskoj šemi koja je već postala monotona, da uvodi što više sadržaja koji će biti u funkciji promovisanja potreba mladih, privrednih subjekata i socijalnih tema.

Mediji po nama imaju zadatak pomoći izlasku iz ove teške situacije, a ne još više je komplikovati, što po mom mišljenju mediji to rade.“

Almedin Devedžić:

„Evo ja ću u ime Kluba vijećnika SDA iznijeti stav i naravno nadam se da će direktor izaći i odgovoriti na pitanja koja su postavili prethodni vijećnici. Dakle, Klub SDA prihvata ovaj izvještaj uz određene sugestije. Evo ja ću reći par riječi o ljudima koji tamo rade. Želim da ih pohvalim, prije svega na jednoj susretljivošću i saradnji sa svojim klijentima, među kojima sam i ja. Iz mog ugla to tako izgleda, a nadam se i iz ugla drugih. Toliko.“

Odgovore na sugestije dao je direktor JU BKC Gračanica Nedžad Peljto:

„Postavljeno je pitanje vijećnika Rahima Gadžića i odgovor je, sredstva koja su tada utrošena utrošena su za opremanje režije i stvoreni su uslovi za digitalni radio koji će uskoro uslijediti. Ono što ja mogu reći, sljedeće godine bit će, Radio Gračanica će se čuti u mjestu iz kojeg Vi dolazite. Na pitanje vijećnika Muje Hasića, istina je da je bilo 11 predstava. Od toga su tri bile posjećene i rasprodane su karte, ali isto tako velika većina karata je bila gratis, tako da je to to. Cijena karata za sve nije bila 8,00 KM nego sam za tri predstave, a ostale su većinom bile gratis. Razlog za ugovor o djelu, jer je i za to bilo pitanja zašto je prekoračeno, napominjem da se to odnosi na stručne saradnike u Radio Gračanici koje se koriste za te svrhe.“

Nije bilo više prijavljenih članova Vijeća za diskusiju.

Izvještaj o radu i finansijskom poslovanju JU Bosanski kulturni centar Gračanica za 2013. godinu usvojen je sa 28 glasova „ZA“ i 2 „SUZDRŽANO“.

#### **TAČKA 10:**

IZVJEŠTAJ O RADU I FINANSIJSKOM POSLOVANJU JU DJEČIJE ODANIŠTE

„Naša djeca“ GRAČANICA ZA 2013. GODINU

Nije bilo dodatnog obrazloženja od strane direktorice JU Dječije obdanište „Naša djeca“ Gračanica.

U diskusiji o Izvještaju učestvovali su:

Mirza Omerdić:

„Ovaj izvještaj o radu JU Dječije obdanište Gračanica je za period 1. 1. – 31. 12. 2013. godine, a na zadnjoj strani stoji pregled prihoda i rashoda za period 1. 1. 2012. do 31. 12. 2012. godine, pa bih molio da se objasni jesu li ovo podaci za 2013. godinu, radi javnosti, ili za 2012. godinu. Ja znam da su ovo podaci za 2013. godinu. Druga stvar koja mi je pala u oči jesu komunalni troškovi. Koliko ja znam komunalno preduzeće ima ugovor sa Općinom, ako se ne varam. Zbog čega ovi poslovi nisu regulisani, ukalkulisani u tu cijenu usluga i mislim da bi mogli i oni da se stave u taj ugovor jer je oko 6.000,00 KM, kako bi te usluge prema ustanovi radili, a ova sredstva bi se utrošila u nešto drugo, pa da se nešto poboljšaju uslovi. Drugo, mi smo prošli puta kad smo razmatrali Izvještaj zaključili da se mora raditi na popunjavanju kapaciteta i vidim da je tu nešto rađeno. Zato treba i na tome i dalje raditi i utvrditi cijene koje mogu privući roditelje da šalju djecu u ovo obdanište. To bi značajno poboljšalo finansijsku konstrukciju Dječijeg obdaništa.“

Esad Tursunović:

„Tražim od direktorice u periodu 2010. – 2014. godina broj uposlenih, broj koji je otišao u penziju i način upošljavanja. Isto tako da se smanje aktivnosti korištenja službenog auta jer se često vidi i nije ni čudo što se ovoliko troši.“

Hasan Puškar:

„Za mene lično, ja mislim da bi za nas trideset bilo dobro zauzeti praksu da od sada Izvještaj koji bude imao grešku vratiti i tražiti odgovornost. U sva tri ova izvještaja imam primjebu i sad ispade kritikujem. Za mene je glupo da budu prosječne plate i mi ovdje računamo i kad sutra neko nešto kaže, kao u Centru za socijalni rad, ispadne da je prosjek plate bio za deset mjeseci, a ustvari je za dvanaest. I kad ti to računaš i negdje sjediš, nije to to. U Izvještaju o radu BKC-a imaju sredstva za održavanje vozila, a oni mislim da nemaju vozilo. I kad se raspravlja samo ja pitam, a nas je ovdje trideset i treba svi da ovo pročitamo. Izvještaj obdaništa treba vratiti i da se donese ponovo, a tražiti odgovornost. Ovo je Izvještaj za 2012. godinu, tako piše. Ovo je za mene totalno neozbiljno. Kad mi nađemo primjedbu, ovo su gluposti. Kako načelnik napiše izvještaj i nikad ni jedne greške nema. Svi imaju svoje službe, svoje knjigovodstvo i svi su plaćeni za svoj posao. I većina na tom poslu nema velike obaveze da bi ovakve greške pravio. Ovdje treba jednom sjesti i donijeti zaključak da se više niko sa nas trideset ne zeza. I treba da mi uzmemo pravilo jednom jer je smiješno za mene da mi raspravljamo o izvještaju za 2012. godinu. Tako piše i ja ne znam je li ovo sad 2013. ili 2012. godina. I za plate Centra ispade samo ja da sam uočio, a svi smo mi to računali. Ispala je prosječna 1.500,00 KM, a mi znamo da to nije tačno 100%, ali će Izvještaj dobiti i neko od građana te reći vidi ovo i to će osuditi sve nas, i Vas direktorice i nas, nema se ko zašto ljutiti. Ovo su stvarno greške kardinalne. Ovaj izvještaj obdaništa je stao na tri lista, je li to toliko posla u obdaništu, a evo da nam možda niste kopirali izvještaj iz 2012. godine i dostavili. Mi smo neka zvanična institucija kojoj se treba podnositi izvještaj. Ovo je neozbiljno za mene i sve samo hvalimo, da da nekad realno popričamo. Druga stvar, imam pitanje. U obdaništu su tri lokacije, a u jednoj lokaciji ima otprilike po 30-ero djece sa 3 odgajatelja, u centralnom ima 80-ero djece i 14 uposlenih. Mogu shvatiti da su tu neka 4 administrativna radnika. Po nekim pedagoškim standardima koliko djece u obdaništu treba na jednog odgajatelja? Molio bih da mi se odgovori na pitanje da bi mogli raspravljati dalje o nekim stvarima.“

Esad Tursunović:

„Gledajući sve ove papire i analizu finansija, ne treba nam izgleda ovakvo obdanište na tri dijela. Ja imam sugestiju i inicijativu da se ova dva obdaništa zatvore, a sredstva da se daju u socijalne svrhe. Sjećam se kolege Muje Hasića od ranije kada je rekao, samo su djeca bogataša. U pravu je, sto i nešto djece, a četiri stotine i nešto hiljada KM. Sa tih četiri stotine hiljada možemo dosta riješiti socijalnih slučajeva itd.“

Mirza Omerdić:

„Ovo sa izvještajem bi se možda i izbjeglo da ste nam direktorice dostavili završni račun, bilans uspjeha. Druga stvar, da li postoji bilo koja služba Vaša da pregleda te izvještaje prije sjednice Vijeća, da se eventualno vidi da li postoje određene neusaglašenosti ili greške, kako bi konačan izvještaj stigao na Vijeće i kako bi izbjegli ovakve i slične komplikacije. Greške se mogu desiti svakome, ko radi taj i griješi, ali eto željeli bi da se to ne dešava.“

Hasan Puškar:

„Mi smo imali Zaključak Općinskog vijeća da se uz izvještaj dostavi i završni račun koji je podnešen Poreskoj upravi. To je bila Odluka Općinskog vijeća i samo nam to ne dostavljaju preduzeća koja mi finansiramo 100%. A kad dođe od Vodovoda, od Komusa, od Veterinarske stanice, dobijamo i završne račune u prilogu. Ako smo mi vlasnici, osnivači, neka jednom bude tako jer ima Odluka i ne odnosi se ovo samo na obdanište. Tamo stoji finansijsko poslovanje, ne samo poslovanje, za mene ovo nije validno, ovo nije zvaničan dokument. Zvaničan je iz Poreske uprave. Poštujte Odluku Vijeća i dostavite nam završni račun.“

Esad Tursunović:

„Ja bih tražio sada da nam kažete broj zaposlenih u zadnje četiri godine, koliko je otišlo u penziju i kojim načinom se zapošljavaju. Da li je bio konkurs, ili je lična želja itd.“

Nihad Krajinović:

„Nisam izašao ovdje da budem advokat ustanove Dječije obdanište „Naša djeca“, ali evo da otklonimo neke sumnje. Molio bih direktoricu, s obzirom da su djeca osjetljiva i ne smijemo njih uzeti, da nam dostave spisak roditelja čija su djeca upisana u ovu ustanovu. Ako imate njihov socijalni status, jer po mojim informacijama djeca tkz. bogataša pohađaju privatna obdaništa u Gračaci, a to je vrlo ružno što se ovdje za govornicom tako razdvajaju djeca. Drugo, svi oni koji imaju dijete i u prilici su, odnosno moraju dijete ostaviti kod nekog, plaćaju po 200,00 KM za čuvanje djeteta i nije ni teško za to odvojiti, a teško im je dati 140,00 KM za obdanište, gdje će naučiti prvo slovo, prvu pjesmicu, dobiti kvalitetan odgoj i imati obezbijedenu hranu i smještaj.“

Hasan Puškar:

„Ja uopšte ne ulazim u to čija su djeca, jesu si srednji, visoki standard, ovako ili onako, u to ne ulazim. Ali znam da smo i mi na komisijama dva, tri puta o ovome raspravljali i upustili se malo u taj problem, mi finansirano radnike obdaništa. Ali da bi mi finansirali radnike, prvo treba uraditi sistematizaciju radnih mjesta. Prvo, po pedagoškim standardima da se utvrdi jedan odgajatelj na destero djece, petnaestero ili petero. Znači moramo znati koliko i kad to budemo znali, onda možda dole treba zaposliti trideset, i onda to i učiniti. Druga stvar, mi plaćamo odgajatelje, topli obrok, plate, uredu plaćamo mislim na Općinu, komunalne usluge, ali sada ostale režijske troškove matematikom doći do cijene je li to 100,00 KM, možda i 200,00 KM. Ko hoće da mu dijete bude u obdaništu, ekonomska cijena je tolika. Kako ćemo mi znati ekonomsku cijenu kada osnovne stvari ne znamo kao osnivači, koliko treba zaposlenih i tačan finansijski izvještaj, čak evo ne znamo ni za koju godinu dobijamo izvjetaj itd. Mi smo mnogo puta o ovome raspravljali i po nama treba da zasjedne jedna komisija oko ovih preduzeća, načelnik je treba formirati i da jednom posložimo, a evo sad imamo i plate, tople obroke uposlenih i vidjet ćemo hoće li se ispoštovati ovaj naš zaključak i tako to. Ovo se ne odnosi samo na obdanište, jer ako smo mi nekom osnivač onda valjda taj treba nama da podnosi izvještaj. Nadam se da će nam direktorica na neke stvari sada odgovoriti.“

Esad Tursunović:

„Ne znam kolega Nihade, šta si mislio oko toga, da kažeš koja su djeca u obdaništu. Ja cijelo vrijeme nemam ništa protiv obdaništa. Ja mislim da su tu djeca od budžetdkih korisnika, a ne od radnika sa 300-400,00 KM platom. Dobre volje ću ja otoviriti obdanište, uzeti 250.000,00 KM od Općine, otvoriti radio stanicu, uzeti 280.000,00 KM. Koliko kulture u BKC ima, 50-60.000,00 samo po osnovu kulture, je li tako? Petsto hiljada KM ide novca u javni sektor, sa tim sredstvima mogu se čuda učiniti u privatnom sektoru, a mi se ovdje udaramo sa ciframa, sa ciframa s tuđim pravom, odnosno s našim pravom. Zato da povedemo računa o budžetskim sredstvima i o svemu što nas boli. Ovo nije ni SDP-ovo, ni SDA-ovo ni ničije drugo, obdanište je sviju nas. Ja ovdje namam ništa ciljano protiv direktorice. U tri navrata su moja djeca bila u obdaništu i ja sam zadovoljan. Ali dajte da riješimo i napravimo što više dobrih odluka i zašto da ne podignemo na 200,00 KM. Ima evo i prvatinik i ovo što je skoro otvoreno je tristo i nešto KM, a u nas sto i nešto. Tih 200,00 KM je podsticaj Općini.“

Nihad Krajinović:

„Ja ću zaista kratko. Uvažavajući zaista one koji zarađuju novac, jer razumijem imam u porodici privatnika, ali moram reći da su obrazovanje i kultura institucije države. Bez toga gubimo tlo pod nogama.“

Mujo Hasić:

„Evo vidim da su sve diskusije kolega upućene u dobrom pravcu i niko ne želi ovdje uputiti nikom posebnu kritiku, nego uticati kako bi se neke stvari mogle i popraviti. Obaveze



osnivača su da se finansiraju plate, topli obrok i materijalni troškovi. To je neupitno, osnim ako neko nekada ne donese Odluku o ukidanju JU Dječije obdanište. Ali dok je Općina osnivač, to su naše obaveze i to je tako. Ja sam nekoliko puta, ranijih godina, ukazivao na te stvari da mi zaista iz budžeta, kojeg pune porezni obveznici finansiramo i subvencioniramo djecu u obdaništu onih roditelja koji imaju tu privilegiju i mogućnost da mogu svoju djecu poslati u obdanište. Nažalost, to je zamisao nekih ranijih vremena gdje su i djeca radničke klase, da se neko ne uvrijedi, imala mogućnost pristupa dječijem obdaništu. Nažalost, primanja tih radnika su takva kakva jesu i ti roditelji nisu u mogućnosti da svoju djecu pošalju u obdanište. I onda polaznici i korisnici usluga dječijeg obdaništa su mahom djeca poslodavaca, budžetskih korisnika i ostalih onih koji imaju novac da mogu priuštiti sebi to zadovoljstvo. Ovdje u ovom izvještaju, u pravu su kolege koje kažu da bi bilo jako dobro da nam dostavite ono što predajete u završnom računu. Tamo Vi ništa ne možete skriti, a nekom bi možda bilo jasnije i korektnije. Ovdje sam ja izašao da pitam koliko košta radnik obdaništa. To je nešto oko 1.400,00 KM uključujući i doprinose. Da li treba njih dole 20 ili treba 25, ili 15. To je sad neka druga stvar i tačno je da bi trebali o tome i mi da povedemo računa, naravno, zajedno sa načelnikom da pokušamo iznaći ono što je najbolje za obdanište. Ja hoću i da pohvalim rad obdaništa, i to zbog angažovanja radnika-uposlenika i Općine, a radi se o kandidovanju i realizaciji projekta za utopljavanje dječijeg obdaništa. S te strane ja čestitam svima koji su učestvovali u realizaciji tog projekta. Ali ako je obaveza Općine ove stvari koje govorim, da budem tako grub, nije obaveza Općine da hrani nečiju djecu. Mora se znači povesti računa kolika bi bila ekonomska cijena usluge obdaništa. Ako je kod privatnika to tristo i više KM, a ovamo 140,00 KM, velika je to razlika i možda sa povećanim prihodom i većom cijenom usluga obdaništa, neka sredstva će se usmjeriti na poboljšanje uslova boravka same djece, a ne za subencioniranje troškova uposlenika. Znači apelujem, po kozna koji puta, da pokušamo iznaći ono najbolje i za osnivača i za uposlenike dječijeg obdaništa i za korisnike usluga dječijeg obdaništa.“

Rahim Gadžić:

„Ja ne bih oko cifri što su kolege iznijeli, ja ću nešto reći što je i moja struka i ja moram reći da su uposlenici dječijeg obdaništa izašli u susret svim osnovnim školama i došli su da odrade pripremno odjeljenje za upis djece u školu. To im ja čestitam. Opremili su nekoliko učionica u osnovnim školama. Znači uposlenici rade svoj dio posla zašto su i plaćeni. Ja smatram da je to odrađeno i da je to prava stvar. Šta mislite da djeca iz Prijekog Brda ili Lukavice i Džakula, Trnovaca i sl. treba da dođu u dječije obdanište u Gračanicu i to odrade, i to mjesec dana dovoziti djecu svaki dan. Ja im čestitam na tome i nadam se da će nastaviti tu praksu, a za ove neke iznešene primjedbe vjerovatno će direktorica dati obrazloženje i pojašnjenje.“

Odgovore na iznešeno dala je Senada Čoso, direktorica JU Dječije obdanište „Naša djeca“ Gračanica:

„Prije svega, ovo što stoji 2012. godina, stvarno je greška moja lična. Obično ta tabela je za svaku godinu. Tabela je ista i prošle i prethodne godine, samo se mijenjaju podaci, koliki su prihodi, koliki su rashodi. Ja se evo izvinjavam to je greška. U prosjeku mi imamo svaki mjesec, osim zimi i ljeti, ljeti kad su godišnji odmori i kad se smanjuje broj djece i zimi kad je januar i raspust ili su djeca prehladna, imamo smanjen broj djece. Evo danas sa današnjim danom imamo 140-ero djece. I sad je vrijeme da se taj broj povećava jer ide sezona do početka ljeta i izađe na 160-ero pa i 170-ero djece. I kad odbijemo to mi dobijemo prosjek od 115 djece, ali u prosjeku je znači oko 150-ero djece. Ima primjera da se djeca i razbole pa tada ne možemo naplatiti 140,00 KM i imamo ugovor gdje se smanjuje cijena. Imamo primjer i da u obdanište dođe 2-3 djece od istih roditelja i tad se cijena smanjuje i do 20% za drugo ili treće. Što se tiče standarda, mi imamo standarde i normative iz Pedagoškog zavoda i Ministarstva obrazovanja koje poštujemo u cjelosti. Moramo ih poštovati jer i nama dolaze kontrole, tako da smo mi što se tiče broja radnika organizovani da imamo sedam odgojnih, obrazovnih grupa u tri objekta. U dva objekta, na Lukama i Gradesu su mješovite grupe. Na Lukama imamo i grupu školske djece, prvi i drugi razred u produženom boravku koju vozimo u školu. I evo što se spominje auto, tim

autom mi vozimo djecu u školu, odvozimo hranu u tri objekta, dva puta dnevno, za doručak i ručak. Djeca imaju tri obroka i nije to veliki trošak. Mjesečno goriva od 100,00 do 120,00 KM. Od tih 20 radnika imamo 14 radnika koji rade direktno sa djecom. Standardi i nomativi obavezuju, jedna grupa od 15-20 djece, mora imati dva odgajatelja. Ne može sa djecom raditi jedan čovjek i odogavarati za 20-ero djece. To su djeca. Radi se u dvije smjene. Od tih 20 uposlenih šest je režijsko osoblje. Mi imamo po standardima broj odgajatelja naspram broja djece. Komunalni troškovi, reći ću vam da je puno i za mene 110,00 KM za odvoz smeća Komusu mjesečno za tri objekta, ali Komus nam ne izlazi u susret. Ali zbog otopljanja smo uštedili 50% troškova za grijanje. Izvještaj je kratak ali korektan i čita se, jer smo mi skratili i napisali samo ono osnovno, što se tiče bilansa imamo mi završni račun i tačan je i potpisan. Svi ovi iznosi u tabeli su tačni kao i u završnom računu. Mogu ja vama dostaviti i završni bilans.“

Obrazložila je i prijedlog oko zatvaranja obdaništa na Lukama, navodeći razloge zašto to ne može, a ne može zbog toga što reaguju roditelji.

„Razmotrit ćemo to rješenje, jer imamo prostor u centralnom obdaništu koji možemo koristiti od septembra. Imamo mi i djece koja borave besplatno što finasira UNICEF. Što se tiče prijedloga za socijalni status roditelja, ja sam prošle godine napravila spisak sve djece, svakog roditelja, ime i prezime i gdje radi. Nisu to djeca privatnika. Od tih 140-ero djece, možda ima 2-3 djeca doktora ili 2-3 privatnika, a ono ostalo su djeca srednje klase da kažem. Nisam za to da se povećava cijena usluga jer je situacija loša. Mi se stvarno nekako pokrивamo i oko 70.000,00 KM mi namirimo za plate, od djece, a trebali bi to utrošiti u poboljšanje uslova. Toga što se tiče mi apliciramo sa mnogim projektima i uspijevamo. Što se tiče predškolskog odgoja jedino Gračanica na tome radi već četiri godine i hvala Rahimu što nas je pohvalio. Mi nismo obavezni ali se trudimo i za to smo dobili pohvalu na seminaru. Ali i to ne bismo mogli da nemamo podršku načelnika i Općine. Što se tiče zapošljavanja u obdaništu ne bih napamet, ali nije problem dostaviti ću ja te podatke. Nama treba nova sistematizacija jer ima osoba sa visokom spremom, a izjednačeni su sa onima koji imaju pono staža a sa višom su školom. Obraćamo se mi Općini da nam se odobri pa vidjet ćemo kako ćemo to riješiti.“

Hasan Puškar:

„Ja se ne slažem s tim da se nešto oko plata mijenja, ako je tu neko sa visokom to je njegov problem i nije to problem budžeta Općine. Npr. ako neko završi kriminalistiku, a radi kao policajac, naravno da će primati plaću policajca. Ne plaća se škola nego radno mjesto. Druga stvar, kad pogledam tabelu na kraju piše gubitak, dobitak i veše ne znam šta je, je li dobitak ili gubitak. Treća stvar, kažete da na prosječan broj djece bude 140, a ovdje piše 115. Ako dva odgajatelja idu na jedno odjeljenje, ova se matematika opet ne poklapa. Kako mogu dva odgajatelja na 30 djece, a u centralnom obdaništu ne može. I radno vrijeme me zbunjuje, dobro su oni plaćeni za šest sati rada na tim poslovima. Kad se krene oko rada i volontiranja najviše se toga odradi u Općini i to puno kvalitetnije nego u drugim ustanovama, a finansira se iz budžeta Općine.“

Senada Čoso je ponovo naglasila zašto se spominju dva različita broja djece. Onih 15.000,00 na kraju tabele nije višak nego kredit koji su imali prošle godine, te obrazložila o čemu se radi.

Esad Tursunović:

„Napomenuli ste broj djece u donjem obdaništu na Lukama, da spremačica odgaja dijete je li tako?“

Odgovor je dala Senada Čoso.

Safet Pjanić:

„Nisam se htio javljati, ali mislim da su kolege dale prveliku pažnju Izvještaju JU Dječije obdanište, a prethodna dva izvještaja su tako lako propustili i o njima se moglo mnogo govoriti i po meni ovo je najbolji izvještaj koji sam ja pročitao. U preambuli ima i broj uposlenih i kolike su plate vidljivo je. Ono što bih ja htio da kažem ovdje je to da ću ja ubuduće, kad budu ostali izvještaji o poslovanju, dati malo više pažnje, jer vidim da su se kolege vijećnici uhvatili za obdanište kao pijan plota, a radi se o struci koja je specifična. Ovdje treba samo ići na

poboljšanje kvaliteta usluge kako bi se privukao veći broj djece. Ovo što se spominje da u obdanište idu djeca privatnika i tajkuna, budžetlija i slično, mi smo to napravili da primaju takve plate i nije tačno jer su vrata obdaništa svima otvorena i za svačije dijete. Moj savjet obdaništu je poboljšati uslove, njegu, bolju hranu i primiti puno više djece, pa će vam se i prihodi povećati kao i rentabilitet. Izvještaj je dobar i ja ga apsolutno podržavam.“

Nije bilo više učesnika u diskusiji i Izvještaj o radu i finansijskom poslovanju JU Dječije obdanište „Naša djeca“ Gračanica za 2013. godinu je usvojen jednoglasno zaključkom koji glasi:

- Usvaja se Izvještaj o radu i finansijskom poslovanju JU Dječije obdanište „Naša djeca“ Gračanica za 2013. godinu.

Data je pauza u trajanju od petnaest minuta.

Nastavku sjednice prisustvuje 29 članova Općinskog vijeća.

### **TAČKA 11:**

#### INFORMACIJA O PRIHODIMA OPĆINE GRAČANICA STEČENIM PO OSNOVU KONCESIJA U 2013. GODINI

Uvodno kratko obrazloženje o Informaciji dao je Zijad Dedić, šef Službe za upravu, naglašavajući da su samo četiri firme potpisale ugovor o eksploataciji prirodnih resursa a očekuje se i „Vodovod i kanalizacija“ u narednom periodu to učini. U tabelarnom dijelu iznosi koji su navedeni su prihodi Općine i pripadaju Općini.

Učesnici u diskusiji su:

Hasan Fehratović:

„Mislim da do sada nismo imali ovako detaljnu informaciju. Ja bih imao samo par pitanja pa ako je moguće da odgovor dobijem od izvjestioca, ako ne mogućnost je da se dostavi od nadležne institucije. Prvo, zbog čega su ovako veliki nesrazmjeri u novčanim sredstvima koncesionara koje uplaćuju u budžet, evo Ekotoplane 844,80 KM, Terme 17.515,00 KM itd. Drugo, kada su u pitanju koncesije d.o.o. Terme naplata se vrši po dva osnova, eksploatacija termomineralnih voda i eksploatacija gasa CO<sub>2</sub>. Ako sam u pravu, a volio bih da nisam, eksploatacija gasa CO<sub>2</sub> se vrši na području općine Gračanica, a prodaja gasa se vrši na području općine Petrovo u RS. I ako je ovo tačno na koji način se vrši naplata sredstava za koncesije po ovom osnovu?“

Odgovor je dao Zijad Dedić, naglašavajući da iznos zavisi od toga na koji period koncesinar potpisuje sa nadležnim ministarstvom i tada on plaća tkzv. jednokratnu koncesionarnu naknadu:

„Zavisi šta je eksploatacija i kreće se od petnaest do pedeset hiljada KM. Kad je u pitanju eksploatacija gasa firma Terme ima potpisana dva koncesiona ugovora, a ima i posebno brojilo čije stanje pregleda nadležna komisija ispred Ministarstva i na osnovu toga utvrđuje se količina eksploatacije gasa i utvrđuje naknada po tom osnovu.“

Nakon toga Informacija o prihodima Općine Gračanica stečenim po osnovu koncesija u 2013. godini usvojena je jednoglasno.

### **TAČKA 12:**

#### NACRT-ZAKON O NOVČANIM PODRŠKAMA U POLJOPRIVREDI I RURALNOM RAZVOJU TUZLANSKOG KANTONA

Ostavljeno je vrijeme do 04. 04. 2014. godine, ukoliko bude primjedbi na Nacrt Zakona o novčanim podrškama u poljoprivredi i ruralnom razvoju Tuzlanskog kantona, da se dostave u Stručnu službu Općinskog vijeća, kako bi se iste dostavile nadležnom ministarstvu.

## TAČKA 13:

### RJEŠENJA I ZAKLJUČCI IMOVINSKO-PRAVNE SLUŽBE

Prije nego se prešlo na ovu tačku dnevnog reda, predsjedavajući Općinskog vijeća Edin Ibrišević je upoznao prisutne da su se sa obraćanjem najavili predstavnici Plenuma Gračanice, predstavnici firme „Grafopak“ i predstavnici firme „Olimp“ Gračanica. Taj dio će se otvoriti nakon završetka sjednice po predloženom dnevnom redu.

Rješenje i Zaključak Imovinsko-pravne službe usvojeni su jednoglasno bez učesnika u diskusiji.

Nakon toga, predsjedavajući Vijeća Edin Ibrišević je dao riječ Mersihi Jogunčić, predstavnici Plenuma Gračanice da se obrati:

„Hvala vam što ste nam pružili priliku i omogućili da govorimo nešto u ime Plenuma Gračanice. Prije svega, nakon svih ovih vaših rasprava, a sobzirom da smo mi direktni predstavnici građana, shvatila sam da je postojanje Plenuma u Gračanici ne nužno i neophodno nego i tri plenuma u Gračanici trebaju. Prva impresija koju sam dobila jutros kad sam kao građanka ovdje ušla u ovaj hol, bila je totalna otuđenost vas, izvršne vlasti, vijećnika od građana. Dakle, nevjerovatna jedna hladnoća, nevjerovatan jedan pa neprijatan osjećaj. Neću pričati sada o tim impresijama, bilo pa prošlo. Plenum Gračanice je stvarnost, Plenum Gračanice djeluje, Plenum Gračanice radi. Ja sam ovo htjela započeti rečenicom, kad neće brijeg Muhamedu, hoće Muhamed brijegu, dakle što vas nema na Plenum. Plenum je vaš, građani su vaši, a i vi ste naši. Da ne idemo sa floskulama dalje i da ne pričamo jedni drugima neke priče za malu djecu, nego očekujemo da se aktivno uključite u rad Plenuma. Očekujemo od vas da aktivno preuzmete odgovornost za ono što se zove rad u Općinskom vijeću, u općinskim službama, rukovođenje Općinom Gračanica. Dakle, mi smo se aktivirali, uključili, podigli, saznali, spoznali. Jedna digresija mala, ukoliko neko od izabranih vijećnika i vijećnica, a ja bih rekla mnogo vas ne zna za određene strategije, dokumente, pa nazivate to tamo nekim dokumentima, tamo nekim usvojenim itd. jer ja kao aktovna građanka i društveno osviještena građanka mogu da vam kažem poimenično kako se koji dokument zove za koji ste vi ovdje glasali, a vi ne znate. Dakle, zove se Strategija uključivanja Općine Gračanica koja je rađena u saradnji sa Biroom za ljudska prava, općinskom službenicom za društvene djelatnosti i nevladinim organizacijama općine Gračanica. Dakle, nju ste usvojili u oktobru prošle godine, ovdje u ovoj istoj sali. Tako da bih vas molila da se malo vratite, da vidite o čemu ste tad pričali. S druge strane Općina Gračanica živi, uz sve pomenute probleme koji se dešavaju u Bosni i Hercegovini i o tome nećemo pričati.

Znamo o čemu se radi, a vidjeli smo iz podnešenih izvještaja koje su eto radili stručni ljudi, firme, javne ustanove, koje vode direktori, direktorice, koji su godinama na jednom te istom položaju a na kraju krajeva dešavaju se greške i dobivaju nekompletni izvještaji, da se dobije pogrešna godina itd. Mislim da to pokazuje samo jednu malu dozu neozbiljnosti i da je možda vrijeme da se pristupi ozbiljnije. Evo mi smo ovdje korektiv, mi smo ovdje kao glas nekih građana i građanki i svakim danom je sve više građana i građanki u Plenumu, a pogotovo me raduje činjenica da se sve više i više jako obrazovanih, jako motivisanih ljudi općine Gračanica uključuje u rad radnih grupa koji su izuzetno stručni. Dakle, Plenum Gračanice nudi svoje tako stručne usluge, nudi saradnju Općinskom vijeću Gračanica i naravno Općinskom načelniku, odnosno zakonodavnoj i izvršnoj vlasti. Ja ću se ovdje osvrnuti prema dogovoru i zaključcima Plenuma, dakle ja govorim u ime Plenuma i osvrnut ću se na zahtjeve koje smo mi kao jako dobri domaćini uputili Općinskom vijeću i Općinskom načelniku. S obzirom da Plenum Gračanice djeluje i bavi se isključivo lokalnim problemima ali međuplenumska saradnja je na zavidnom nivou. Neko je ovdje od gospode rekao, nema više protesta. Nisam pretjerano sigurna u tu tvrdnju. Dakle plenumske organizacije takođe rade na mirnom dogovoru, kako to zovemo, mirnim artikulisanjem građana, ali svakako protesti niti bilo kakvo okupljanje u tom smislu nije isključeno niti je završeno na nivou Federacije, a evo govorit ćemo o Tuzlanskom kantonu. Naš prvi zahtjev koji smo mi uputili prema vama odnosi se na najširi problem naše kompletne zajednice i mi se u potpunosti slažemo da se mora rješavati sistematski. Međutim, ne možemo

se uhvatiti toga da rješavamo problem odozgo, problem ide odozdo. Općinska vijeća, lokalne zajednice su vaze i svaka piramida zna se kako se gradi. Dakle, ima donju najdužu pa idemo prema vrhu, ne moram ja to vama objašnjavati. I u odgovoru ste se pozvali na Strategiju o ekonomskom razvoju gdje se tretira i pomenuti problem, a to je problem nezaposlenih. E sad u odgovoru na tako jedno složeno pitanje ne izaći sa pripremljenim akcionim planom, ne izaći sa kriterijima, ne izaći sa prioritetima pripremljenim za zapošljavanje na lokalnoj zajednici ukoliko se stvore i ostvare uslovi, dakle krajnje je neozbiljno. Mi nemamo nikakav podatak. Ja ne znam da li ga imate vi, o broju zaposlenih i nezaposlenih. Ja slučajno imam izvještaj koji govori da smo prošle ili predprošle godine, oprostite ako griješim, imali 9.500 nezaposlenih. I samo vas molim nemojte pričati o ljudima koji rade na crno, jer to je direktno kršenje zakona i o tome ne treba uopšte diskutovati, dakle, akcioni plan kriteriji i prioritet. S obzirom da takvu vrstu odgovora nismo dobili ni u kakvom obliku smatramo da se tom strategijom apsolutno niko ne vodi i da ta strategija ne trpi nikakve ni promjene niti bilo kakve korekcije, s obzirom na našu lokalnu zajednicu. Znači, ne postoje projekti za zapošljavanje ni jedne, apsolutno ni jedne kategorije stanovništva, a ne one na koju smo se mi prioritetno osvrnuli, a to je boračka populacije s obzirom da smo takav pritisak imali na Plenumu građana. Općina nije više u obavezi, dakle da pripremi uslove za otvaranje firmi i stvaranje radnog ambijenta. Općina je dužna da provodi Zakon u javnom i privatnom partnerstvu koji je usvojen prije dvije godine i mislim da Općina Gračanica ima izuzetne uslove za primjenu javnog i privatnog partnerstva. Dakle, moguće je da bude i nosilac i ulagač i da stvara ambijent da se ostvaraju radna mjesta. Ja ne znam, pričali ste prilikom usvajanja izvještaja a ti izvještaji se uglavnom prepisuju, o osnivanju socijalnih firmi. Htjela sam reći da sam slušajući izlaganje dobila ideju za bar nekih pet projekata koji bi direktno riješili jedan dio nezaposlenosti u općini Gračanica. I u vezi s tim, s obzirom da sam aktivistkinja u nevladinim organizacijama u proteklih deset pa i više godina na međunarodnom nivou, dobila sam dakle ideje za bar pet projekata, između ostalog, osim javnog privatnog partnerstva i tzv. socijalne firme koje se, čini mi se, jako lijepo tretiraju u toj strategiji o inkluziji Općine Gračanica koja je uvojena. Zahtjev o reviziji privatizacije ste prihvatili. Znamo da to ima veze sa vašim nivoima vlasti i mi očekujemo da ćete vi kao izvršna i zakonodavna vlast Općine Gračanica vršiti skupa s nama pritisak na više nivoe vlasti i da ćemo dobiti izvještaj koji je transparentan i koji ćemo skupa s vama razmotriti. Treći zahtjev nemogućnost zastare krivičnog gonjenja odgovornih za korupciju, privredni kriminal kojeg ste takođe podržali i takođe zahtjeva sistemsko djelovanje, isto tako nadam se da ćemo skupa u saradnji s vama doći do nekih podataka pa onda vjerovatno i procesuiranja s obzirom da smo tražili nemogućnost zastare. Isto tako i više instance vlasti naravno da moraju riješiti zdravstveno osiguranje sa kojim imamo jako velike probleme. Iz Socijalnog u Gračanici smo dobili podebeo spisak, zato vas pozivam da dođete na Plenum da čujete neke informacije za koje ste vjerovatno zakinuti. Dakle rješavanje zdravstvenog osiguranja i zdravstvene zaštite. Peti zahtjev se odnosio na rješavanje problema zdravstvenog osiguranja obespravljenih radnika sa područja općine Gračanica i mi tražimo rok da se hitno riješi zdravstveno osiguranje tih radnika po principu Dite Tuzla. Dakle, riješila je Dita. Izvolimo i mi pokrenuti i riješiti zdravstveno osiguranje tih radnika jer to treba hitno, ti su ljudi bolesni. Pričali ste malo prije, bogati i siromašni, socijalni, ovakav ili onakav, nema ovdje srednje klase, nema potrebe da se iko gosp. Mujo uvrijedi da radnička klasa, nema radničke klase. Imamo mi puno problema. Potpisivanje saradnje između Doma zdravlja i Opće bolnice je jedna poprilično neozbiljna situacija da to nemamo, ali evo nakon 04. 04. 2014. godine mi se nadamo pozitivnom odgovoru. I sad imamo jedno sedmo pitanje, koji je bio zahtjev i odnosio se na bespravnu gradnju. Plenum Gračanice smatra da je potpuno neadekvatan jer nismo dobili informaciju za rad građevinskih inspekcija kad su u pitanju bespravno izgrađeni objekti koji su se ili se sad legalizuju. Ša to znači? Kako smo dobili infomaciju, dakle ukoliko krene bespravna gradnja, građevinska inspekcija koja je u nadležnosti Općine treba da reaguje. Mi nemamo informaciju da li je ikad građevinska inspekcija reagovala, ukoliko jeste želimo izvještaje i kako se onda počela dešavati ta naknadna legalizacija i šta se već dešava, a znamo da je legalizovana. Mislim nemamo mi s tim problema. Upućeni smo na stručnu službu. Plenum odbija ići na stručnu službu jer smatra da je šef stručne službe u direktnom sukobu interesa, te ne bismo dobili adekvatan odgovor. I zbog toga smo se obratili Općinskom vijeću, a vi nam niste

dali adekvatan odgovor. Jedna vrlo bitna stvar s kojom je upoznat Plenum Gračanice je Prostorni plan uređenja koji je odbijen na kantonalnom nivou. Dakle, on nije na kantonalnom nivou prihvaćen i koliko mi imamo informaciju jedini razlog je neusvajanje pretvorbe zemljišta Kokaproduct u Stjepan Polju, koje je prvoklasno zemljište a) kategorije, u građevinsko zemljište, a ne pretvorba ostalih površina u istu namjenu. Dakle i zgrada BKC-a koja još uvijek vuče dio problema. Predloženo je da se ta zgrada da na korištenje građanstvu u skladu sa opštim javnim interesima. Ja se osvrćem na ove zahtjeve jer želim da vam pokažem na koji način treba odgovarati Plenumu Gračanice. Ne trebate nam odgovarati upakovano, imamo Strategiju, nemamo Strategiju itd., imamo u planu. Pošto sam ja ovdje vas slušala cijeli dan i vi samo nešto planirate, dakle vi morate raditi, mi se moramo konektovati, ovdje mora doći do pročišćenja. Dakle mi smo zato tu da dođe do pročišćenja, da malo ubrzamo i da damo vjetar u leđa i vama i nama. Uposleni u Općini i svim javnim institucijama, to obrazloženje prihvatamo, samo kad nam budu dostavljeni pravilnici o sistematizaciji radnih mjesta i ekonomskoj opravdanosti istih. Zahtjev ćemo dostaviti u izmijenjenom obliku taksativno navedeno šta i ko nas zanima. Dakle, ko je primljen u radni odnos, kolika su primanja i izdvajanja i zahtijevat ćemo sve inspekcijske izvještaje ukoliko su inspekcijski organi radili bilo šta po tom pitanju. Paušali, znate kako ste riješili paušale, umanjenje nije 50%, 20% pa 30%, nije 50%, izračunajte, ali nije ni važno. Važno je napomenuti da se na vanrednoj sjednici Općinskog vijeća nije raspravljalo o zahtjevima Plenuma, dobili smo odgovor iz kabineta predsjedavajućeg, nego je vanredna sjednica zakazana na inicijativu Kluba vijećnika SDA pa se onda u sklopu toga uklopila da ima i zahtjev Plenuma. Dakle, čisto da se razjasni. Nije se raspravljalo o zahtjevima Plenuma, nego se raspravljalo o inicijativama koje je pokrenuo Klub vijećnika SDA. Revizija dodjeljenih boračkih kredita, zahvaljujemo se za spisak koji je naknadno dostavljen. Međutim, boračke organizacije izjavama na Plenumu kažu da se nije radilo u skladu sa Pravilnikom, jer oni koji nisu dobili kredit u jednoj godini, po automatizmu ako nisu bili u toj godini i izostavljeni su, trebali bi naredne godine imati prioritet, međutim to se nije dešavalo. To su informacije iz boračkih organizacija boraca. Vi ćete nama vjerovatno dostaviti odgovor na izmijenjena pitanja, dakle konkretno zašto se nije tako radilo. Raspodjela nije vršena po proceduri, po kriterijima, dodjela kredita po hronološkom redu, a ne znam kako se to borci selektiraju i koji borac zaslužuje više a koji manje. Ako prema nekoj populaciji treba biti osjetljiv, onda je to boračka populacija i treba se prema istoj okrenuti jer zaslužuju svu našu pažnju. To je u nadležnosti komisije koju imenuje Općinski načelnik, kako smo i dobili u odgovorima iz kabineta Općinskog načelnika. Pravilnik o unutrašnjoj organizaciji i sistematizaciji hitno javno objaviti. Tamo smo dobili informaciju da je taj pravilnik pripremljen i da ima i da eto ovih dana treba da se pojavi javno. Dakle, mi želimo da bude hitno obznanjen i da bude dostupan građanima općine Gračanica. A Općina Gračanica je potpisala Konvenciju EU o standardima, dakle i očekujemo da istu primijeni i ispoštuje. To je jedan uposlenik na 1000 stanovnika. Pozvati se na to da imamo službe, naravno da ih imamo, koje općine u EU nemaju s obzirom da su različite potrebe EU, ali zbog toga ne možemo neispoštovati standarde EU s obzirom da smo potpisnici Evropske konvencije. I općine u EU imaju službe koje nema Općina Gračanica pa funkcioniraju. Dakle, zanimalo bi nas da se ispoštuju standardi prema potrebama i ta situacija bi se mogla izbalansirati. Opet napominjem, potpisnici smo Evropske konvencije. Ono što potpišemo toga se moramo držati. Takođe, moguće je odvojiti neke službe, vatrogasna služba, dvorana itd. i apsolutno ne moraju ulaziti u općinske službe i pozivati se na to da to imamo, jer su to druge općine riješile na drugi način. Da li mi to možemo ili ne, vidjet ćemo. Po pitanju zahtjeva o reviziji budžeta mi smo tu napravili grešku, propust, međutim ispraviti ćemo ga i ubuduće kad budemo preformulisali naš zahtjev, tražit ćemo reviziju utroška budžetskih sredstava i kontrolu budžetskih transakcija od strane upravne inspekcije. Mislim da ćemo u tom kontekstu moći da se nademo. Dalje, zahtjev za ukidanje stručnih i vanjskih saradnika, njemu nije udovoljeno. Dakle, nismo dobili nikakvo utemeljeno objašnjenje čemu, koliko i zašto. U radio emisiji smo čuli da je neko od savjetnika kroz projektne aktivnosti donio Općini sredstva u iznosu od 4,3 miliona EUR-a. To je gotovo još jedan budžet Općine Gračanica. Ukoliko postoji takva osoba onda mi imamo čudo i mi bismo voljeli da zaista ta osoba bude i nagrađena i javno pohvaljena i javno promovisana. Jer jedan takav uspjeh zaslužuje zaista da mu se klanja cijela općina Gračanica. Jedan takav savjetnik automatski zaslužuje sve moguće privilegije i nagrade.

Dakle, javnost je potrebno upoznati i koji su to projekti, zašto su ta sredstva namijenjena i gdje će biti utrošeno, 4,3 miliona EUR-a je gotovo budžet Općine Gračanica. Ali smo upoznati da su preko IPA fonda svim općinama upućeni pozivi za projekte. Iz općinskih službi trebalo je prikupiti i uputiti dokumentaciju. I ukoliko je to neko od savjetnika to zaista sam uradio i donio taj iznos, ponavljam, treba to promovirati na pravi način, ali to automatski anulira rad Službe za razvoj i poduzetništvo, a rezultati te službe u proteklom periodu poprilično su poznati i pozitivni. Dakle imamo jednu malu digresiju, jedno malo razilaženje, rad jednog savjetnika, dakle potpuno anulira rad jedne službe za razvoj i poduzetništvo. I četrnaesti zahtjev od petnaest odnosio se na zdravstvenu zaštitu maloljetnih lica do 18 godina na koju oni imaju pravo. Vi ste preskočili da odgovorite na taj zahtjev. Apsolutno ne postoji odgovor na taj zahtjev, što smatram i kao roditelj i kao građanka da je sramota. Sramota je ali eto dešavaju se greške, kako ono vi kažete, ko radi taj i griješi. Odlično. Sad ćemo ga ispraviti. I mi vas pozivamo da hitno, kao odgovorna vlast uputite zahtjev svim školama na području općine Gračanica s obzirom da se direktori osnovnih i srednjih škola imenuju iz određenih političkih staranaka, da se izvrši evidencija maloljetnih lica i da se izvrši ovjera knjižica, mislim da zaista ne bi trebali dalje da se blamiramo i da imamo taj problem. Ovo je sramota. I petnaesti zahtjev, očekujemo znači pozitivan ishod sa sastanka 04. 04. 2014. godine, dakle odnosi se na logopeda. Za svaku pohvalu je da imamo educirane logopede, da imamo aparat za logopede, da smo imali taj projekat koji je nekim čudom prekinut. Općina je svoj dio ispunjavala s tim se slažemo u potpunosti, ali trebamo izvršiti pritisak na one koji su trebali ispunjiti taj drugi dio tog logopedskog tretmana, pa ćemo vidjeti šta će se desiti i da vidimo da se to nastavi. Zaista imamo sve uvjete da imamo logopeda. Imamo uslove i to treba u Domu zdravlja da bude. Znamo mi da logoped ne spada u uposlenike Doma zdravlja, ali je Dom zdravlja do neke godine imao u sistematizaciji pola logopeda i to je bio taj projekat i bio je dogovor, ali se nekim čudom to prekinulo i mi očekujemo da se to hitno uspostavi. I još nešto što želim napomenuti. Plenum je aktivno uključen i prati razvoj u rješavanju problema Mješovite srednje škole Gračanica. Mislim da nikome ne treba pojasniti o čemu se radi i mi očekujemo da se to hitno riješi u što skorije vrijeme. Mješovita srednja škola mora vratiti ugled, mora vratiti status i poziciju koju zaslužuje kao jako, jako brojna škola. Evo danas ste raspravljali o planu upisa, dakle vratiti joj ugled, a znate na šta sam mislila. Ne moram apsolutno da se vraćam na to. Pratimo situaciju, očekujemo rješenje u što skorijem vremenu. Međutim za sve nepravilnosti i svaka nepravilnost i eventualno kriminal u javnim ustanovama, obraćamo se agenciji za istrage i zaštitu i idemo raditi svako svoj posao. Ja vam se zahvaljujem, nadam se da ćemo se vidjeti na Plenumu i nadam se uspješnoj saranji.“

Sedad Gazibegović:

„O svemu ovom ne znam da li će biti diskusije, ja za sada ne želim da diskutujem, ja bih samo replicirao. Izvinio bi se predstavnicima Plenuma zbog svog niskog koeficijenta inteligencije, pa nisam u stanju zapamtiti ni puni naziv jednog dokumenta koji je usvojen u oktobru. Direktorica koja je bila tu, nastavila je i zna koliko sam tog naziva znao, ali mislim da osim tog niskog koeficijenta inteligencije ima i mojih šezdeset godina, jer da je to bilo prije treideset vjerovatno bih ja to sve upamtio. Kad sam već izašao za govornicu da kažem oko ovog poziva na Plenum. Svi mi smo razumjeli da mi nismo poželjni na Plenumu. Tako smo to gledali i slušali. Iz sredstava javnog informisanja najbolji primjer je u Tuzli, gdje je rečeno, onaj je onog svog ugurao tamo. Nas drže za neke političare, a ja sebe lično ne smatram na ovom lokalnom nivou nikakvim političarom, osim čovjeka koji je uključen u ovu lokalnu zajednicu, u probleme lokalne zajednice i dajem svoj prilog da se to riješi. Znači ne, nikakav političar ali bez obzira na to na puno mjesta su ljudi za koje se samo zna da su članovi neke partije, pa čak i simpatizeri nisu bili dobro došli na plenum. Da ne govorimo o visokim političarima, kakvi smo mi općinski vijećnici.“

Mersiha Jogunčić:

„Meni je zaista žao i zamolila bih Vas, nemojte mi rušiti nadu, niti ovoliko poštovanje koliko imam prema Vama, meni lično kao građanki, a ni Plenumu Gračnice. Dakle, gospodine Gazibegoviću ja sam Vas samo podsjetila kao aktivna građanka da kažem kako se zove ta

strategija. I s obzirom da Vi sjedite u Općinskom vijeću i obnašate funkciju zakonodavne vlasti i Vaše godine ne bi trebale biti upitne, niti bi trebale stvarati problem Vašoj efikasnosti u radu. Ukoliko one stvaraju problem, onda se to mora riješiti na neki drugi način. Vi znate koji građani i građanke, odnosno učesnice i učesnici Plenuma su svi građani i građanke općine Gračanica. To ne isključuje niti Općinskog načelnika, ni gospodu vijećnike niti pripadnike bilo kojih političkih partija. Radi se o sljedećoj stvari, a to je da se Plenum Gračanice bavi rješavanjem problema od javnog interesa. Nikakvih ličnih interesa, nema, ne zanima me da li je neka politička partija, mene kao učesnika Plenuma, mene kao samohranu nezaposlenu majku, mene kao aktivistkinju nevladinih organizacija, mene koja u Gračanici radi, djeluje i koja je upoznata i sa aktima i sa propisima, a nisam za to plaćen ni 050% KM i hvala Bogu ja se osjećam vrlo lijepo zbog toga što to sve znam. Mene niko ne može isključiti iz toga da budem građanka svog grada i da u svom gradu želim da stvaram ambijent sebe i svog djeteta. Sad ću Vas pitati jednu stvar. Kad ste usvojili Izvještaj o radu Centra za socijalni rad, znate li da Centar za socijalni rad Gračanica nema evidenciju koliko na općini Gračanica ima samohranih roditelja? A pogotovo ne koliko ima samohranih nezaposlenih roditelja. Dakle, hajde malo da spustimo nišan i počnemo malo razmišljati s ovog dole dijela i shvatiti da smo svi građani i građanke Gračanice, odnosno općine Gračanica. Hajde da malo znamo da su u oktobru izbori i vratiti se na to da ste dobili povjerenje građana i građanki, odnosno stanovnika općine Gračanica. Kako i na koji način pojedini vijećnik po na osob. I to se zna. Ali ste legitimni, izabrani ste, plaćeni ste i trebate to da radite. Trebate odgovarati gradu Gračanici, građanima i građankama koji su Vam dali povjerenje. Ne odgovarati u smislu da Vas neko treba pozivati na linč, nego ukoliko su se desili propusti, ukoliko su se desili problemi, idemo ih zajedno ispravljati, imamo mi rješenja, prijedloge rješenja. Od Vas takođe očekujemo prijedloge rješenja, pa pobogu zato ste tu, i onda ćemo lijepo krenuti naprijed i ići ćemo jedan po jedan rješavati. Znamo mi da je to proces, znamo mi da je proteklih 20 godina urušilo sve. Prema tome, nemamo lično ništa ni protiv koga, osim ukoliko neko ne dođe i ne počne da postavlja pitanja ili protežira bilo kakav politički program. To nije dopušteno na Plenumu, prema pravilima Plenuma. A kad pričate o tome ko je poželjan na Plenumu možete o tome pričati samo kad dođete na Plenum i kad vam neko kaže izađite. Ne možete pričati nikom priču rekla-kazala. I nisu tačne priče da je neko od političkih partija vraćen. Apsolutno nije tačno. Dakle, pozivamo vas da se aktivno uključite u rješavanje problema grada Gračanice koji su nagomilani i kojih ima gomile i gomile. Posebna priča su javne ustanove i sistematizacija radnih mjesta, pravilnici, konkursi, zapošljavanje itd. Molim vas nemojte na ličnom nivou shvatati ništa. Vi ste izabrani zvaničnici i ja vam se kao takvim obraćam.“

Mujo Hasić:

„Evo da malo prokomentarišemo. Ovdje nama gospođa Mersiha Jogunčić svašta napriča od početka, kao da smo mi trebali da se izljubimo u hodniku ili ne. Naravno, jednostavno neko se pozdravi, neko ne. Za ove ljude ovdje što sjede u sali, njih 30, oni su dobili preko 25.000 glasova na općini Gračanica za izbore 2012. godine. Jedan od učesnika tih izbora je bila i gospođa Jogunčić. Bili ste na listi, možda i griješim, ali uopšte nije bitno. Znači pravo je svakoga da bira i da bude biran. A ja imam osjećaj da smo mi ovdje kao neka mala djeca, da nam ovdje neko drži pridike. Ovdje ima jako uspješnih privrednika, samo da Vam kažem, jako uspješnih prosvjetnih radnika. I svi oni ovdje imaju neki kvalitet. A ja zaista imam osjećaj da nama ovdje neko pokušava nametnuti neka svoja nova znanja, koja mi ne znamo. Moguće je da nismo dovoljno dobro upućeni. Moje legitimno pravo je da ja dođem na Plenum ili ne dođem. Ja apsolutno nikad nisam komentarisao rad Plenuma. To je civilno društvo ima pravo da radi i da daje svoje prijedloge i kao takav može biti korektiv zakonodavne, odnosno izvršne vlasti. I to je apsolutno tačno. Ali ja Vas zaista molim, nemate potrebe da napadate i spominjete neke stvari koje su periferne, da li je neko nekog pozdravio ili ne, nemate potrebe. Radite svoj posao. Dajte svoje prijedloge i sugestije koje će razmatrati zakonodavna ili izvršna vlast na području općine Gračanica. Hvala Bogu, naravno izbori su sad u oktobru, lokalni 2016. i svako ima pravo da u okviru političke partije ili kao samostalni kandidati izađe na izbore i time ocijeni sam sebe i zasluži broj glasova koji će ga odvesti, da li u Općinsko vijeće, da li u Kantonalnu skupštinu ili u Federalni parlament itd. itd.“



Mersiha Jogunčić je replicirala:

„Evo dakle ponavljam. Mersiha Jogunčić je u ime Plenuma i ne govori u svoje lično ime. A i da govorim u svoje lično ime podržala bih sve ove stvari. Niko ne dovodi u pitanje broj glasova koje je neko dobio na ovim izborima. S obzirom da mi uvažavamo taj broj glasova i vas kao izborne zvaničnike, mi vam se tako i obraćamo. Mi smo se referirali na zahtjeve koje smo uputili izvršnoj i zakonodavnoj vlasti, odnosno mi smo zahtjeve uputili svima vama. Apsolutno Vam ne dovodimo u pitanje koliko ste uspješan privrednik, niti nam pada na pamet, s obzirom da se zna i za Vaš uspjeh i zato koliko doprinosite gradu i zato što su svi kao Vi, i tako uspješni poželjni i dobro došli i na Plenum. I da nam kažete, kako trebamo i šta trebamo. Ali nemojmo se bahatiti i biti otuđeni. O tome sam i pričala gospodine Hasiću, o osjećaju otuđenosti vlasti od naroda. Ja sam građanka grada Gračanice, sa punim pravom da živim ovdje isto kao i Vi, pričala sam o otuđenosti. Dođete ovdje, pričate priče. Ja sam danas ovdje čula priče. Ja sam danas ovdje čula priče, trebamo, trebali bismo, imamo namjeru, mogli bismo, moramo početi. Sve te stvari bi trebale da budu i da imaju kontinuitet. One bi trebale da budu već u procesu, da se rade. O tome se radi. Radi se konkretno, da se utvrdi cilj, rokovi i to je to. Niko nije podcijenio ni Vijeće ni Općinskog načelnika, niti bilo koga od izvršne i zakonodavne vlasti, niti nam pada na pamet. Ne pada nam na pamet da mi rješavamo probleme bez vas. Vi ste legitimni predstavnici građana i građanki općine Gračanica i molim vas da se tako i ponašate. Nisam ja, niti neko iz Plenuma došao da se s vama ovdje nastoji prepucavati. Ja nemam tu nikakvih ličnih interesa. Provodimo zakone, provodimo konvencije i ponašajmo se tako.“

Mujo Hasić:

„Ja bih zaista želio da znam kako se mi to ponašamo. Je li ovo neko nenormalno ponašanje, kako se mi to ponašamo. Sad nam ovdje neko drži pridike kako se mi trebamo ovdje ponašati. Kao mi se odrodili od nekoga. Mi se apsolutno nismo odrodili. Ako sebe neko želi da izvaga na neki način zato postoje načini kako da neko utvrdi, da kažem svoju popularnost. Zaista bih vas zamolio da mi objasnite kako se mi to ponašamo. Jesmo li mi to nekulturni, je li mi to nekog ugrožavamo, je li mi to nekog vrijeđamo? Ja za sebe mogu reći da sam apsolutno društven, odgovoran. Ja svoj život posvećujem takvim nekim stvarima. To što neko nešto tako ne može osjetiti to je sad druga stvar. Ja i svi mi ovdje zaista želimo učiniti najbolje stvari koje su moguće za sebe i za zajednicu u kojoj živimo i za građane. Često puta ne uspijevamo i tad dolazi do frustracije. Ja moram ovdje naglasiti, a pogotovo se to odnosi na mlade. Jako veliki broj pred izbore pristupa određenim strankama. U svim znači strankama koje učestvuju na izborima. I kad dođu izbori, ako neko eventualno od tih ne vidi nešto lično, nažalost odmah mu stranka ne valja, ona nije ništa kao ni program itd. Onda iz te ide u drugu, treću, desetu stranku i na neki način pokušava riješiti svoje individualne probleme. Niko, ili je jako mali broj ljudi ne vodi računa o tome da li i kako razvijati društvenu zajednicu u kojoj živimo. A da napomenem, šta je u ingerenciji općinske vlasti, da li izvršne ili zakonodavne. Nažalost nije zapošljavanje, jer nemamo te ingerencije. Šta je do lokalne zajednice? Do lokalne zajednice je kaže stvoriti ambijent. Koji? Da dobije na vrijeme građevinsku dozvolu. Znači, sve neke stvari koje se mogu riješiti su na višim nivoima vlasti. Ja bih lično volio da mi zaista ovdje imamo takvu infrastrukturu gdje ćemo privući strane investitore, gdje ćemo i domaćim investitorima omogućiti da jednostavnije dolaze do nekih stvari. Nažalost Općina Gračanica nema resursa onih koje treba imati, nema zemlje, nema mogućnosti da dodjeljuje određene parcele privrednicima na 20, 30 ili 100 godina. I uvijek se pitamo kako, kako, a vi nama govorite ovdje da mi trebamo donijeti Akcioni plan o zapošljavanju. Ja zaista smatram, svi mi ovdje, možda nismo dovoljno vidoviti, možda mi ne znamo dovoljno bez obzira što neko od nas ima uspješne firme, da vi to nama predložite. I ako je to zaista tako, ja ne vidim razloga zašto da se to ne podrži. Pa evo uloga Plenuma je da da jedan pravi konstruktivni prijedlog i ostvari te donese i kaže, gospodo draga, nama treba to, to i to i hoćemo da zaposlimo sto ljudi. Svaka čast, evo ja ću prvi to podržati. Dajte donesite, a nemojte govoriti treba to i to, a niko ne zna kako. Moram reći danas je zaista najlakše biti privatnik. Zašto? Jednostavno, onaj ko završi kuću, stavi pod hipoteku, digne kredit kod banke i počne se baviti privatnim biznisom. Ako propadne ode mu kuća, pa ko mu je kriv. Nije niko, sam je kriv. Znači jednostavno ima nekih stvari koje meni nisu jasne. Pa evo vi mi

rasjasnite. Evo ja očekujem od ekspertne vlade da nam ponudi i da vidimo gdje je to do sada bila apsorbovana pamet, a nije do sada mogla da bude izražajna. E to ja očekujem.“

Mersiha Jogunčić:

„Opet miješamo babe i žabe. Dakle, ja ne učim nikoga kako će se ponašati. Vi ste birani da stupite i sebi odredite model ponašanja. Dakle, postoji kodeks ponašanja izabranih vijećnika, bila sam član Etičke komisije, a danas nam fali član te komisije i mislim da nije više aktivna što je opet kritika na rad komisije i one koji sjede u toj komisiji. Ja samo kažem da više ne postoji konekcija između građana i izvršne i zakonodavne vlasti. Niste ovdje iznijeli ni jedan problem koji se tiče direktno građana. Kad govorimo o Akcionom planu, niko nije rekao da treba čarobnim štapićem napraviti Akcioni plan da se zaposli 9.500 ljudi, nezaposlnih osoba na evidenciji Biroa za zapošljavanje općine Gračanica. Rekli smo da trebamo imati Akcioni plan za našu lokalnu zajednicu s tim da se taj plan naravno uklapa u sistemsko rješenje. Dakle, nismo ni mi niti neuki, niti neinformisani, pa nismo ni neobrazovani. Akcioni plan podrazumijeva to što naša vlast namjerava što bi uradila s tih 9.500 nezaposlenih pa da vidimo kako. Doći ćemo s projektima. Imamo projekte i doći ćemo s projektima pa ćemo tada vidjeti hoćemo li moći pričati na tom nivou na kojem želite da razgovaramo. Ali još jedna napomena. Nismo mi tu da vama stvaramo ambijent i rješenja. Vi ste tu da nama nudite rješenja. Da se osvrnete na probleme, da nam ponudite rješenja šta ćete ustvari uraditi po pitanju određene problematike koja se tiče općine Gračanica. Ne držim vam pridike, podsjećam vas na to šta vam je uloga. Vi ste odgovorni građanima. I nemojte mi samo reći da građani ne mogu da upute kritiku i korektivnu mjeru pa ko vam dade tih 25.000 glasova? Ko ih dade? Dadoše ih građani kojima ste dužni podnijeti izvještaj. Imate u Vijeću ljude koji nikad nisu stali za govornicu. I nemojmo pričati priču koja nije utemeljena ni u čemu. Nemojte misliti da ljudi koji su oko vas i dali vam povjerenje ne znaju ništa o vama. Svi mi znamo sve te pravilnike napamet, s obzriom da nas se tiču. Durga stvar, ja ne znam kako će se napraviti strategija za bilo šta, ne samo za zapošljavanje. Za svaku aktivnost i djelatnost treba Akcioni plan kako ćemo djelovati. Obratit će se vama i radnici „Grafopaka“ i „Olimpa“ pa ćete čuti i šta vam oni imaju reći. Dakle vi ste njihova vlast i naša vlast i dužni ste nam dati odgovor pa kako god se vama to sviđalo ili ne sviđalo. Dužni ste. Kako postoji način dolaska na vlast tako postoji i način odlaska, tako da se ne hvatamo na te priče. Što se tiče prelaska iz partije u partiju s tim namam ništa, ja imam jednu i jedinu i neka svako živi po svojoj savjesti i svojim moralnim načelima. Svi imaju pravo da dođu na Plenum i učestvuju u radu Plenuma.“

Himzo Avdić:

„Drao mi je što je Plenum uvrstio u svoje zahtjeve i pitanje boračke populacije. Da ne mislite vi u Plenumu da ovdje ima samo privatnika, doktora, ima ovdje profesora, penzionera, demobilisanih boraca i običnih fizičkih radnika. Nije ovdje dakle samo privatluk u Vijeću, iz svih sfera života ima ovdje ljudi. Evo ja u svoje lično ime moram reći da sam četiri godine bio u vojsci u ratu. Dvadeset sedam godina sam na birou. Od Teočaka, Olova, Sarajeva, od Orahovice preko Becnja itd. sve sam obišao. Bio sam diverzant, obnašao funkciju komandira čete. Četvero djece školujem, a ustvari više nisam na birou jer su me skinuli putem automatizma, čim sam postao vijećnik, nemam zdravstvenu zaštitu, a djecu sam osigurao preko BIZ-a. Hvala Bogu bio sam u ratu pa mogu. Nemam dakle zaposlenje, sada kada bih ga tražio u nekoj javnoj ustanovi ili javnom preduzeću, vi bi vjerovatno kroz taj fejbuk provukli, vijećnik se zaposlio u javnoj ustanovi. Vi ste iznijeli svoje zahtjeve, a za najnačelnika u Federaciji proglašen je naš načelnik, u suficitu je budžet, a vi nama niste uputli nikakve kritike kao Općini nego ste iznijeli samo zahtjeve. Šta smo mi to loše uradili. Ja nisam lopov i ne dozvoljavam da me iko tako zove. Niste vi to rekli, nego je to na protestima, ali sam morao ovako reagovati jer sam osjećao potrebu za tim. Kad su bile demonstracije od građana maloljetnika je bio govor da smo mi lopovi. Na Plenum neću nikada doći, vidio sam ja koji su ljudi tamo i ovo govorim lično, a ne ispred kluba BPS-a. Kad budu ljudi kao ja i borci kao ja, tad ću doći na Plenum. Toliko.“

Predsjedavajući Vijeća je dao riječ Kasimi Đulić, radnici firme „Grafopak“ Gračanica:

„Obraćam se sjednici Općinskog vijeća ispred obespravljenih radnika firme „Grafopak“. Radnici Grafopaka dijele sudbinu ostalih propalih firmi na našem kantonu i to sve zbog loše upravljačke politike u društvu i nebrige vlasnika za kompaniju. Poslodavac je radnicima godinama isplaćivao platu akontativno bez uplate doprinosa. Posljednja plata je isplaćena u julu 2013. godina, a zbog neuplaćenih doprinosa za više godina radnicima je uskraćeno pravo na ličječenje, pravo na penziju kao i pravo na naknadu od Biroa za zapošljavanje. Mnogi od radnika su u stanju socijalne pomoći. Ne mnogi, već skoro svi. Već deset mjeseci proizvodnja u Grafopaku je stala, radnici poslani kući, a dvoje direktora Zumreta Kenjar i Nermin Salihbašić i dalje sjede u Grafopaku i prodaju našu imovinu. Jedan period je sa njima sjedio i tehnički direktor Mustafa Mujkić koji je takođe učestvovao u tome. Zadnjih mjeseci uspjeli su da vrbuju jedan dio radnika da pokrenu stečajni postupak. Najveći apsurd je to što je i Općinski načelnik pomogao u pokretanju stečajnog postupka, dajući 10.000,00 KM za uplatu takse, za što se nismo svi složili. Prije četiri mjeseca načelnice niste primili Grafopak, delegaciju Grafopaka. Rekli ste, idite Seadu Čauševiću, nemate od mene šta tražiti. Otkud sad odjednom takva darežljivost. Zašto načelnik i vijećnici nisu izvršili pritisak na Kanton da se u Grafopaku pokrene proizvodnja. Mogli su Livnici čelika pomoći, a očekuje se pomoć Konjuhu i Diti. Grafopak je imao ugovorene poslove i mogli smo vratiti stare kupce. Radili 80% za izvoz, radili punim kapacitetom tri smjene, a plate primali u dva mjeseca. Tako nam rukovodstvo Grafopaka duguje 15 zarađenih neisplaćenih plata. Znači neko je namjenski gurao Grafopak u propast, da bi ga po pokretanju stečaja neko kupio za male pare, jer se nalazi na atraktivnoj lokaciji i nekom moćniku je zapala za oko ta lokacija. Zato ovim putem zahtijevam da se izvrši revizija privatizacije u Grafopaku, te da se procesuiraju svi oni koji su upravljali Grafopakom od 1992. godina pa do sada. Nemojte da bude samo obećanje i mrtvo slovo na papiru već poduzmite konkretne mjere. Da naglasim da je Grafopak prije rata bio najjača firma na općini. Imali smo plate veće od budžetskih radnika, a sad smo postali prosjaci, što znači da smo opljačkani. Sad smo spomenuli samo neka imena koji su krivi za propast Grafopaka, a ima ih još i nije problem pomenuti ih.“

Fahrudin Dogdić:

„Ja sam upolenik Grafopaka i ovdje sam, te koristim ovu priliku da kažem trenutnu situaciju u Grafopaku. Mi smo održali jedan sastanak na kojem je većina donijela odluku da Grafopak ide u stečaj. Tom prilikom nam je došlo od suda da se uplate 10.000,00 KM, a mi nismo imali tih novaca. Mi smo se obratili gospodinu načelniku da nam pomogne u toj situaciji. S obzirom da je došlo do mimoilaženja mi smo kod načelnika održali sastanak i uručili mu spisak radnika. Od 44 uposlenika u Grafopaku trenutno se na to pospisalo 36 uposlenika. Ovom prilikom se zahvaljujem načelniku što nam je pomogao da mi uradimo to s obzirom, moram napomenuti, da je Grafopak privatizovan, da imaju vlasnici. Vlasnici u ovom momentu nisu imali sluha i mi smo ovo uradili što smo uradili. Ne mogu a da ne kažem i ovo da je načelnik imao sluha pa je uposlenicima Grafopaka dao jednokratnu pomoć u visini od 50,00 KM i ja se ovom prilikom zahvaljujem u svoje lično ime i u ime radnika Grafopaka. Ne mogu a da ne kažem da je 07. 02. 2014. godine gospodin načelnik, kada su bili prvi protesti izašao pred zgradu Općine, pred protestante i zaustavio da se ne desi kao što se desilo u Tuzli i u drugim gradovima. Primio građane, primio protestante, primio radnike i držali smo jedan sastanak i tražili od načelnika da udovolji zahtjevima i koje je uglavnom u svojoj moći načelnik uradio i ovo vijeće uradilo. Ja se još jednom zahvaljujem i načelniku i vijeću na pomoći radnicima Grafopaka.“

Ramiza Šuša:

„Ja sam bivša uposlenica Grafopaka. Eto ja uvijek imam običaj reći pošto u Grafopaku nismo primali platu, živjela sam od penzije od mog muža, jer je umro pa ja imam nekakvu sreću u nesreći pa imam od čega živjeti. A evo ovim putem ja imam dva pitanja. Zašto je uprava gurala da radnici pokrenu stečaj? Zašto nije rukovodstvo pokrenulo stečaj, zašto nisu banke pokrenule stečaj? Zašto stečaj nisu pokrenuli većinski vlasnici?“

Fadila Mujić, predstavnik radnika „Olimp“ Gračanica:

„Ja sam radnica Olimp-a i predsjednik sindikata, ali ovdje neću govoriti kao predsjednik sindikata već ću govoriti jednostavno kao radnik Olimp-a i kao građanin ovog grada. Kao prvo neću puno govoriti o svojoj firmi Olimp, jer sve firme na našoj općini su tu i tamo, pogotovo firme koje su izašle iz rata, u istom položaju. Sad slušamo Grafopak, imamo Fering, imamo nažalost još firme koje su tako propale i vjerujte pitanje je dana kad će to biti i Olimp, kad će to biti Fortna. Neka se Safet ne naljuti, ali to je sigurno tako, jer je takav ambijent u kojem radimo i mi i ništa nam sigurno dobro ne nosi. Malo bih se osvrnula na ove, da tako kažem, nažalost propale firme. Moram da pitam kolegu iz Grafopaka koji je ranije izašao za govornicu. Pokrenuli su stečaj. Svi mi znamo šta znači stečaj. I nas, pa i mene u firmi uvjeravaju da je stečaj oporavak. Ne, stečaj je likvidacija. To mi svi znamo, nismo mi od juče. Zašto niko ovdje, sad postavljam pitanje vama vijećnicima, nikada nije tražio odgovornost nadzornih odbora ili upravnih odbora propalih firmi? Mi svi znamo da svaka firma koja propadne, da iz nje rukovodstvo firme izađe toliko bogati i svi sebi obezbijede privatnu firmu i onda firmu stavljaju pod stečaj ili likvidaciju eventualno. Likvidaciju ustvari 100%. Znači zašto nikada ovo vijeće nije pozvalo privrđnike predstavnike firmi, firmi koje proizvode, firmi koje plaćaju PDV, da se održi jedna ovakva skupština i da se o tome razgovara. Ja nisam čula ni od koga da je jedan direktor recimo odgovarao za propast firme. Svi direktori iz tih propalih firmi, oni su danas veće gazde nego su to bili u tim matičnim firmama u kojima su bili direktori. To je jako žalosno. Upravni i nadzorni odbori, nikada nisam čula da je i jedan predsjednik, predstavnik tog odbora odgovarao za propast firme. A najveći krivci za propale firme su upravo nestručni ljudi u upravnim i nadzornim odborima i normalno direktori koji nisu sposobni da vode fabrike. Ja vas molim da jednu tematsku sjednicu održite i da se posveti tim pitanjima jer vjerujte sutra svi radnici Olimpa i Fortune bit će socijalni problemi. To vam garantujem jer će ostati i bez liječenja i bez plate i to nisu samo radnici, to je 2000 porodica. A to je pitanje dana. I zato vas molim i vas vijećnike i Vas načelnice, jer ne znam da ste ikada, da pozovete sve naše direktore firmi i da vidite koji je razlog bio u propadanju tih firmi. Ja vam garantujem da je ljudski faktor u pitanju, da nije u pitanju to što je firma morala da propadne, već koliko god je bilo to u pitanju, u pitanju je i ljudski faktor. Pod ljudskim faktorom smatra i državu koja uopšte nije dala ambijenta ljudima da rade. Pod broj jedan, a pod broj dva najveći krivac je država koja je dozvolila poslodavcima da rade nezakonito, da rade kriminalno. Ovo što se radi u firmama, pa ljudi ja imam dvadeset godina nepovezanog staža, a trideset osam ukupno radnog staža i za dvije godine trebam u penziju. Ne znam da li će moja firma raditi još dvije godine. Dajte jednom ljudi posvetite se tom pitanju i pomozite nam. Sigurna sam da Olimp kao Olimp može raditi i niko me ne može ubijediti da treba ići pod stečaj. Sigurna sam da i Fortuna može raditi, ali treba pomoći i stvoriti ambijent da se radi. A prije svega treba raščistiti sa nesposobnim ljudima i dovesti sposobne ljude na sve pozicije. Svaki direktor koji se u firmi ponaša domaćinski i kojem je prioritet firma, pa tek onda kuća, ta firma će i opstati. Ako je obrnuto ta firma će ne može opstati.“

Safet Pjanić:

„Reći ću par stvari vezano za Plenum i mislim da smo mi svjesni šta je danas Plenum i da je to vrlo ozbiljna stvar. Ja sam ga bar teko i doživio i shvatio jer ja sam ovdje čovjek možda najnezadovoljniji kad je u pitanju rad ove aktuelne vlasti i više puta sam isticao to. Ja imam 1.300 radnika i 5.000 knjižica ovjeravam mjesečno i plaćam 110.000,00 KM doprinosa i sve svoje radnike penzionišem kad steknu uslove za penziju. Ja sam prije dvije sjednice molio Vijeće da se obrati Ministarstvu TK da mi pomognu u naplati mojih potraživanja, da se izrazim, keš love, koje sam ja uplatio, i to par miliona, da bih penzonisao 40 radnika, da bih uposlio novih 40 radnika i stvorio uslove za novi rad, međutim od toga nije bilo ništa. Ja sam zbog toga doveden u situaciju da propadnem, a imam posla za dvije ovakve fabrike. Molio bih Plenum da shvati da ovo što su oni iznijeli danas, da to nije konsolidacija vijećnika i Plenuma i da stvari koje su iznesene kao zadaci i kao pitanja, budu malo strpljivi i da će to sve doći na red i da skrate odgovore na to. Vjerujte ova zakonodavna vlast ima neke stvari koj nisu njena ingerencija, a pogotovo Općina jer su njene ingerencije vrlo male i to je metar-dva od Općine i tu je kraj. Sve ostalo je na višim nivoima vlasti, tako da ja ne krivim lokalne zajednice jer su njihove

ingerencije male. Ja sam jedini čovjek koji uz firmu ima i Centar za socijalni rad i obdanište jer se vizavi firme najviše s njima susrećem, ali sam čovjek i privrednik i učestvovao sam u programima sanacije i Grafopaka i Feringa i Olimpa. Ja sam prije deset godina napravio firmu koja se zove Fortex i koja je danas kupila pola Fortune. Ko je vlasnik nije ni važno. Važno je da ljudi svi rade i dobijaju platu. Mogli su to uraditi i čelni ljudi, odnosno vlasnici ovih firmi i predlagao sam im, ali su uradili nešto na brzinu i došlo je do narušavanja međuljudskih odnosa i to je propalo u vodu. Stečaj nije ništa poražavajuće za firmu, sve zavisi od stečajnog upravnika i može se firma restruktuirati i stvoriti uslovi za rad. Isto tako i u Feringu koji je specifičan i sad dolaze ti ljudi, Rusi i šta će se desiti vidjet ćemo. Olimp je to isto uradio kao i Fortuna i na dobrom je pravcu da napravi izlaz iz ovog stanja i sve je po zakonu i ništa nije nelegalno. Tako da vi ne trebate da se borite za status Olimpa nego se borite da imate posla. To su takve grane, mali smo grad i kao privrednik mislim da u Gračanici ima dosta firmi koje imaju perspektivu da stanu na zdravu granu, da im se pomogne kod viših nivoa i da se sredstva koje potražuju, kao Fortuna i Vlada TK, da i Plenum ako može nešto pomogne, jer je to vrlo aktuelno. Ima tu od strane vas i dobrih stvari i mislim da će vrijeme pokazati da je ovo vijeće na dobrom putu da mnoge stvari koje do sada nisu rješavane riješi i da su ovi ljudi kadri i sposobni da to urade i ne treba im davati nikakve savjete, kad je u pitanju Vijeće jer ovdje ima ljudi različitih, penzionisanih, nezaposlenih i tako treba i da ih doživite.“

Fadila Mujić:

„Ja neću repliku, ali moram ipak gospodinu Safetu reći da ja ne znam ni jednu firmu koja je otišla pod stečaj i da je oživjela. Dvadeset tri fabrike iz naše grane su propale, ni jedna se nije izvukla i sve su otišle u likvidaciju. Ja vas nisam kritikovala i nisam smatrala da ste neozbiljni. Smatram da vi radite i ovo što sam uputila vama zahtjev, mislim da to nije nikakav kritički zahtjev. Samo sam zamolila da malo više povedete računa o privredi. Bez privrede država je mrtva. Imamo mi problema, tako da imamo štete i po pitanju zdravstva jer nam prekidaju radnicima bolovanje i neizliječene šalju na posao što ide na teret firme. Što se tiče otvaranja firme u firmi ja to nikad podržati neću i kažeš po zakonu je. U našoj državi je kriminal po zakonu. U nas u Olimpu za 40 ljudi se plaćaju doprinosi, a 300 ljudi je kao radnici koji rade na crno.“

Kadima Đulić:

„Ja imam samo jednu molbu, da nam pomognete u kontrolisanju stečajnog upravnika, zajedno s nama radnicima, sa Plenumom i da naša firma krene u proizvodnju, a da ne ide u likvidaciju.“

Mersiha Jogunčić:

„Ja ću još samo jednu rečenicu da kažem i izvinite što vam uzimam još vremena. Dakle, Plenum je oblik direktne demokratije i to je novi momenat u političkom životu BiH. Vjerujem da se mnogi nisu saživili sa takvim načinom izražavanja i komunikacije građanske volje, zahtjeva, diskutovanja. Dakle to je jedini način direktne demokratije. To je jedna stvar koju sam htjela napomenuti, a druga stvar, što se tiče viših nivoa vlasti gdje se mnogi problemi rješavaju s obzirom da zaista Općina nije nadležna. Na osnovu stope PDV-a koliko se izdvaja iz Gračanice prema višim nivoima, mislim da to daje jednu smjernicu da Općina Gračanica, odnosno izvršna i zakonodavna vlast mogu vršiti itekako pritisak da se stvari s viših nivoa vlasti spuštaju na niži nivo. Tako bi riješili mnoge probleme, sprintske salu i slično.“

Esad Tursunović:

„Svašta sam čuo i ne znam šta bih rekao. Evo izlazi kolega Pjanić i ova gospođa, privrednik sam iz MZ-e Stjepan Polje. Ne znam strukturu odnosa privatnog i državnog u tim firmama. Sutra ja mogu otvoriti firmu u firmi. Četrdeset i nešto ljudi imam zaposleno. Jedan period ne plaćam ništa i napravim gubitak. Ne mogu više da slušam neke priče. Firma je dužna dvadeset i nešto miliona. Dosta više tih priča.“

Na kraju za riječ se javio Općinski načelnik, Nusret Helić:

„Red je da kažem par rečenica. Prije svega ja sam Plenum doživio kao partnere. Partnere u radu, a ne samo da se upućuju zahtjevi, nego da Plenum pomogne da nalazimo rješenja i ako

ima taj kapacitet, da zajedno rješavamo neke stvari. Kod mene se dolazi uvijek i može. Nije tačno da smo se mi otuđili od građana. Ja to nikad neću prihvatiti. Kad je u pitanju načelnik možete vi pričati šta hoćete. Dakle, dođite i dođite i sa prijedlozima. Vi ste uputili zahtjeve i sljedeći puta su zahtjevi. Ja ću odgovoriti na zahtjeve i to što neko nije zadovoljan s odgovorom to je nešto drugo. Dođite sa prijedlogom pa ćemo sjesti i spreman sam sa vama i ja i ovo vijeće da nalazimo rješenja. Samo tako možemo uspjeti. Ako se postavite vi tamo mi ovamo, nema od toga ništa. Prema tome ja vas molim, dakle vidjet ćemo s kim god hoćete, vi ste napisali, pogledajte vaš zahtjev. Tražimo da se napravi strategija lokalna za 9000 nezaposlenih ljudi i ništa kriteriji itd. Koja to pamet, evo načelnik nije glup, ovo vijeće nije kako treba. Hajde da rješavamo dio po dio i tražiti rješenje. Nezaposlenost je u čitavoj BiH. Ako misli neko da će jednim zahtjevom to riješiti, ja ga odmah ljubim i ja odlazim odavde, a vi riješite neke stvari. Dakle, molim vas, hoću da zajednički i trebamo kao odgovorni, uvijek sam govorio, na svakom od nas je dio odgovornosti za stanje u Općini. Nemojte samo misliti na ove u šarenoj zgradi. Kad bi promijenili i došli vi, ne mogu ti ljudi sami stvarati ambijent i slično. Može se puno bolje to smo priznali i valja nam tako raditi. Ovo vezano za privredu. Nije stvar ingerencije, mi ćemo ovdje sjediti kad god hoćete na temu privrede, ali ono suštinsko se rješava gore, a ovi ljudi koji mogu rješavati ne bave se tim pitanjima, da li zbog ove političke situacije ili bilo čega. Mi ćemo u okviru naših mogućnosti i budžeta i svega naći prostora da potaknemo neke. Evo ovo što smo usvojili neke strateške dokumente, a imamo ih puno, Strategijom su predloženi određeni projekti i valja se vratiti. Strategiju nisu radili samo ljudi iz Općine, radio je jedan širi krug ljudi, privrednika i nevladinog sektora, ali su one živa materija. I vjerovatno ima potrebe da je revidiramo. I uvijek ćemo sjesti i raditi. Za Grafopak samo da znate, nije tačno da načelnik nije htio primiti delegaciju. U ta tri dana tri četiri puta smo sjedili pa smo zvali i predsjednika sindikata, granskog, pa smo i tu razgovarali šta je za radnike najbolje. Ja nisam privrednik, ali saradujem malo s njima i tu je procijenjeno da je najbolja varijanta. Šute vlasnici, šute fabrike, niko ništa ne pokreće, a vi nemate posla, nemate osiguranja. Onda smo ocijenili da je najbolje pokrenuti stečajni postupak jer će on dovesti do nečega. I mi smo kao ozbiljna vlast i ovo vijeće zaključili da pomognemo, jer radnici nemaju para, tih 10.000,00 KM. I ja sam tražio potpise od većine radnika i dat ćemo. Nisam dao odmah. Dakle, to je naša želja da se pokrene jer mislimo da će se nešto desiti u stečajnom postupku. Slažam se, možemo zajedno svi više ići prema višim nivoima. Malo prije sam govorio koliko nama duguju para, pa evo i Pjaniću duguju. Dubioza je gore i valja njih pritiskati i spremni smo ići do kraja. Morate shvatiti dokle je naša nadležnost. Lokalna vlast, pogledajte zakon pa ćete vidjeti, putevi, vodovod, kanalizacija itd. Što se tiče sale mi se ubili dokazujući da je sala kantonalna ali smo bili odgovorni, milion se zadužili da se pokrene. I jutros sam spomenuo kad sam obrazlagao izvještaje, mi ćemo morati ako ovo ovako bude zadužiti se, pošto mi nismo zaduženi. Mi imamo još jednu ratu ove godine za sportsku salu koja je postala vlasništvo omladine. Ona se vodi kao vlasništvo u Općini, ali svi klubovi imaju besplatno korištenje i valjda ćemo mi morati završiti i ovu salu. Ja ako budem tu, a i ovo vijeće, vjerujem da će potegnuti zaduženje da obebzijedimo onu sramotu tamo koja se dešava. Uzalud je nama građanima govoriti da je to Kanton. Jeste Kanton i možemo mi i ovo vijeće reći ne interesuje nas, ali su tamo naša djeca. I ono je tamo stvarno cirkus. Dakle, spremni smo dajte da kao partneri predložite, a evo ima organizacija GIA, zvat ćemo i njih. Krenut ćemo od nekih pitanja da probamo zajednički tražiti rješenje.“

Predsjedavajući Vijeća je zaključio sjednicu, a završena je u 15.45 sati.

Zapisnik vodila: Azra Mustajbašić  
Tonski snimak sjednice uredno je arhiviran.

Azra Mustajbašić

PREDSJEDAVAJUĆI  
OPĆINSKOG VIJEĆA

mr.sci. Edin Ibrišević